

點圈

百子全書

掃葉山房發行

081.3
52205



山海經圖讚

郭璞

璞字景純河東聞喜人晉宣城太守殷祐引為參軍又參王導軍事歷著作佐郎王敦起為記室參軍敦反璞遇害及敦平追贈宏農太守璞撰筮驗六十餘事名為洞林又撰新林十篇卜辭一篇注釋兩雅別為音義圖譜又註三蒼方言穆天子傳山海經及楚辭子虛上林賦數十萬言詩賦誄頌亦數萬言

南山經圖讚

桂

桂生南裔拔萃岑嶺廣莫熙葩凌霜津穎氣王百藥森然雲挺

迷穀

爰有奇樹產自招搖厥華流光上映垂霄佩之不惑潛有靈標

狂狂

狂狂似猴走立行伏權木挺力少辛明目蜚廉迅足豈食斯肉

水玉

水玉沐浴潛映洞淵赤松是服靈蛇乘烟吐納六氣昇降九天

白猿

白猿肆巧繇基撫弓應眇而號神有先中數如循環其妙無窮

鹿蜀

鹿蜀之獸馬質虎文據此吟鳴矯足騰羣佩其皮毛子孫如雲

鯨

魚號曰鯨。處不在水。厥狀如牛。鳥翼。蛇尾。隨時隱見。倚乎生死。

類

類之為獸。一體兼二。近取諸身。用不假器。幼穉是佩。不知妬忌。

搏訖

搏訖似羊。眼反在背。視之則奇。推之無怪。若啟不思。厥皮可佩。

祝荼草旋龜鵠鵠魚

祝荼嘉草。食之不饑。鳥首。蛇尾。其名旋龜。鵠鵠六足。三翅。竝翬。

濯濯鳥赤鱗

厥聲如訶。厥形如鵠。佩之辨惑。出自青丘。赤鱗之物。魚身人頭。

鵠鳥

彗星橫天。鯨魚死浪。鵠鳴於邑。賢士見放。厥理至微。言之無況。

猾褊

猾褊之獸。見則興役。膺政而出。匪亂不適。天下有道。幽形匿迹。

長右龍

長右四耳。厥狀如猴。實為水祥。見則橫流。龍虎具身。厥尾如牛。

會稽山

禹祖會稽。爰朝群臣。不度是討。乃戮長人。玉璽表夏。立石勒秦。
愚燕

有獸無口。其名曰患。害氣不入。厥體無間。至理之盡。出乎自然。

犀

犀頭如猪。形兼牛質。角則併三。分角互出。鼓鼻生風。壯氣隘溢。

兕

兕推壯獸。似牛青黑。力無不傾。自焚以革。皮充武備。角助文德。

象

象實魁梧。體巨貌詭。肉兼十牛。目不踰豕。望頭如尾。動若丘徙。

纂雕瞿如鳥虎蛟

纂雕有角。聲若兕號。瞿如三手。厥狀似鵝。魚身蛇尾。是謂虎蛟。

鳳

鳳皇靈鳥。寶冠羽群。八象其體。五德其文。羽翼來儀。應我聖君。

育隧谷

育隧之谷。爰含凱風。青陽既謝。氣應祝融。炎雰是扇。以散鬱隆。

鯽魚鰕鳥

鰕鳥棲林。鯽魚處淵。俱爲旱徵。災延普天。測之無象。厥數推玄。

白荅

白荅罩蘇。其汁如飴。食之辟穀。味有餘滋。道遠忘勞。窮生盡期。

西山經圖讚

羝羊

月氏之羊。其類在野。厥高六尺。尾亦如馬。何以審之。事見爾雅。

太華山

華嶽靈峻。削成四方。爰有神女。是挹玉漿。其誰遊之。龍駕雲裳。

肥遺蛇

肥遺爲物。與災合契。鼓翼陽山。以表亢厲。桑林既禱。倏忽潛逝。

鵩渠赤鷺鳥文莖木鵩鳥

鵩渠已歿。赤鷺辟火。文莖愈聾。是則嘉果。鵩亦衛災。厥形惟磨。

流赭

沙則潛流。亦有運赭。于以求鐵。趨在其下。蠲牛之癘。作采於社。

豪苑

剛鬣之族號曰豪氣毛如攢錐中有激矢厥體兼資自為牝牡

黃雀草肥遺鳥鷩獸

浴疾之草厥子赭赤肥遺似鷄其肉已疫鷩獸長臂為物好擲

橐𦉰

有似人面一脚孤立性與時反冬出夏蟄帶其羽毛迅雷不入

桃枝

蟠冢美竹厥號桃枝叢薄幽藹從容鬱猗簞以安寢杖以扶危

杜衡

狴狴卉人杜衡走馬理固須因體亦有假足駿在感安事御者

膏谷草谿邊獸櫟鳥

有華無實膏谷之樹谿邊類狗皮厭妖蠱黑文赤翁鳥愈隱痔

礧石

稟氣方殊舛錯理微礧石殺留蠶食而肥物性雖反齊之一歸

櫻如

櫻如之獸鹿狀四角馬足人手其尾則白貌兼三彰拳木緣石

鸚鵡

鸚鵡慧鳥。青羽赤喙。四指中分。行則以背。自貽伊籠。見幽坐趾。

數斯鳥。擊獸鷗鳥。

數斯人。脚厥狀似鳩。擊獸大眼。有鳥名鷗。兩頭四足。翔若合飛。

鸞鳥

鸞翔女。帝鳳出丹穴。拊翼相和。以應聖哲。擊石靡詠。韶音其絕。

鳬溪鳥。朱厭獸。

鳬溪朱厭。見則有兵。類異感同。理不虛行。推之自然。厥數難明。

鸞鸞

比翼之鳥。似鳬青赤。雖云一形。氣同體隔。延頸離鳥。翻飛合翮。

丹木玉膏

丹木煒燁。沸沸玉膏。黃軒是服。遂攀龍豪。眇然升遐。羣下烏號。

瑾瑜玉

鍾山之寶。爰有玉華。光彩流映。氣如虹霞。君子是佩。象德閑邪。

鍾山之子鼓欽鵒

欽鵒及鼓。是殺祖江帝。乃戲之。崑崙之東。二子皆化。矯翼亦同。

鯀魚

見則邑穰。厥名曰鯀。經營二海。矯翼間霄。唯味之奇。見難伊庖。
神英招

司帝百服。其鳥名鷄。沙棠之實。惟果是珍。爰有奇菜。厥號曰蓂。
神長乘

九德之氣。是生長乘。人狀豹尾。其神則凝。妙物自潛。世無得稱。
西王母

天帝之女。蓬髮虎顏。穆王執贄。賦詩交歡。韵外之事。難以具言。

積石

積石之中。實生重河。夏后是導。石門湧波。珍物斯備。比奇崑阿。

白帝少昊

少昊之帝。號曰金天。颯氏之宮。亦在此山。是司日入。其影則圓。

猗

章義之山。奇怪所宅。有獸似豹。厥色惟赤。五尾一角。鳴如擊石。

畢方

畢方赤文。離精是炳。旱則高翔。鼓翼陽景。集乃流災。火不炎正。

文貝

先民有作。龜貝為貨。貴以文彩。賈以小大。簡則易資。犯而不過。

天狗

乾麻不長。天狗不大。厥質雖小。禳災除害。氣之相王。在乎食帶。

三青鳥

山名三危。青鳥所憩。往來崑崙。王母是隸。穆王西征。旋軫斯地。

江疑獫狁獸鸛鳥

江疑所居。風雲是潛。獸有獫狁。毛如披蓑。鸛鳥一頭。厥身則兼。

神耆童

顓頊之子。嗣作大正。銛鏘其鳴。聲如鐘磬。處於騄山。唯靈之盛。

帝江

質則混沌。神則旁通。自然靈照。聽不以聰。強為之名。曰惟帝江。

謹獸鵠鵠鳥

鵠鵠三頭。謹獸三尾。俱禦不祥。消災辟眚。君子服之。不逢不韙。

當扈

鳥飛以翼。當扈則鬚。廢多任少。沛然有餘。輪運於轂。至用在無。

白狼

矯矯白狼有道則遊應符變質乃銜靈鉤惟德是適出殷見周
白虎

魁魼之虎仁而有猛其實載皓其文載炳應德而擾止我交境
駁

駁惟馬類實畜之英騰髦驤首噓天雷鳴氣無不凌吞虎辟兵
神魏蠻蠻冉遺魚

其音如吟一脚人面鼠身鼈頭厥號曰蠻目如馬耳食厭妖變

懷木

懷之為木厥形似槌若能長服拔樹排山力則有之毒則宜然

鳥鼠同穴山

錫鼈二蟲殊類同歸聚不以方或走或飛不然之然難以理推

鯨鮪魚

形如覆鉢也玉含珠有而不積泄以尾閭聞與道會可謂奇魚

丹木

爰有丹木生彼清盤厥實如瓜其味甘酸蠲痼辟火用奇桂蘭

窮奇獸羸魚孰湖獸

窮奇如牛。蝟毛自表。濛水之羸。匪魚伊鳥。孰湖之獸。見人則抱鰐魚。

物以感應。亦不數動。壯士提劍。氣激白虹。鱗魚潛淵。出則邑悚。北山經圖讚。

水馬

馬實龍精。爰出水類。渥洼之駿。是靈是瑞。昔在夏后。亦有何駟。鯨魚。

涸和損平。莫慘於憂。詩詠萱草。帶山則脩。壑焉遺岱。聊以盤遊。雕疎獸鵠。鷄鳥何羅魚。

厭火之獸。厥名臚疎。有鳥自化。號曰鵠鷄。一頭十身。何羅之魚。孟槐。

孟槐似狸。其豪則赤。列象畏獸。凶邪是辟。氣之相勝。莫見其迹。鰐鰐魚。

鼓翮一揮。十翼翩翩。厥鳴如鵠。鱗在羽端。是謂怪魚。食之辟燔。

橐脫

駝挂奇畜。肉鞍是被。迅驚流沙。顯功絕地。潛識泉源。微乎其智。

耳鼠

趾實以足排虛以羽翹尾翻飛奇哉耳鼠厥皮惟良百毒是禦

幽類

幽類似猴俾愚作智觸物則笑見人佯睡好用小慧終是嬰繫

寓鳥五極足訾獸

鼠而傳翼厥聲如羊五極似豹或倚無良見人則呼號曰足訾

鷄鳥

毛如雌雉朋翔群下飛則籠日集則蔽野肉驗鍼石不勞補寫

諸健獸白鷓鴣斯鳥

諸健善叱行則銜尾白鷓鴣斯厥狀如雉見人則跳頭文如繡

磁石

磁石吸鐵璫瑁取芥氣有潛感數亦冥會物之相投出乎意外璫瑁一作琥珀

旄牛

牛充兵機兼之者旄冠于旌鼓為軍之標匪肉致災亦毛之招

長蛇

長蛇百尋厥鬣如燕飛群走類靡不吞噬極物之惡盡毒之厲

山獬

山獬之獸見人歡譖厥性善投行如矢激是惟氣精出則風作謹亦作吼

冥寂諸懷獸鰈魚肥遺蛇

冥寂諸懷是則害人鰈之為狀羊鱗黑文肥遺之蛇一頭兩身

黃魚

陽鑒動日土蛇致宵微哉黃魚食則不驕物在所感其用無標

抱鵝

抱鵝貪牀其目在腋食人未盡遂自齧割圖形妙鼎是謂不若

狢間駢馬獨狢

有獸如豹厥文惟縹間善躍嶮駢馬一角虎狀馬尾號曰獨狢

鸞鵠

禦腸之鳥厥名鸞鵠昏明是互晝隱夜覲物貴應用安事鸞鵠

居暨獸慕鳥三桑

居暨豚鳴如棠赤毛四翼一目其名曰慕三桑無枝厥樹唯高

驊獸

驊獸四角馬尾有距涉厯歸山騰嶮躍岨厥貌惟奇如是旋舞

天馬

龍馮雲遊。騰蛇假霧。未若天馬。自然凌翥。有理懸運。天機潛御。

鷗鷖

鷗鷖如鳥。青身黃足。食之不饑。可以辟穀。內厥唯珍。配彼丹木。

飛鼠

或以尾翔。或以鼻凌。飛鼠鼓翰。脩然皆騰。用無常所。惟神是馮。

鵠鵠象蛇鰩父魚

有鳥善驚。名曰鵠鵠。象蛇似雉。自生子孫。鰩父魚首。厥體如豚。

酸與

景山有鳥。稟形殊類。厥狀如蛇。脚二翼四。見則邑恐。食之不醉。

鳩鵲黃鳥

鳩鵲之鳥。食之不醺。爰有黃鳥。其鳴自叫。婦人是服。矯情易操。

精衛

炎帝之女。化為精衛。沈形東海。靈爽西邁。乃銜木石。以填波害。

辣辣羆九獸大蛇

辣辣似羊。眼在耳後。竅生尾上。號曰羆九。幽都之山。大蛇牛响。

東山經圖讚

鰮鰮魚從從獸蛭鼠

魚號鰮鰮如牛虎駘從從之狀似狗六脚蛭鼠如鷄見則旱涸

倮倮

倮倮蛇狀振翼灑光憑波騰逝出入江湘見則歲旱是維大祥

猗猗

猗猗則含珠獸胡不可猗猗如豚被褐懷禍患難無繇招之自我

堪孖魚鈴鈴獸

堪孖鈴鈴殊氣同占見則洪水天下昏墊豈伊妄降亦應牒識

珠鱉魚

澧水之鮮形如浮肺體兼三才以貨賈害厥用既多何以自衛

狢狢

狢狢之獸見人佯眠與吳協氣出則無年此豈能為歸之於天

狸力獸鷲鷲鳥

狸力鷲鷲或飛或伏是惟土祥出興功築長城之役同集秦域

朱孺

朱孺無奇。見則邑駭。通感靡誠。維數所在。因事而作。未始無待。

撇撇螻蛭獸絜鉤鳥

撇撇如狐。有翼不飛。九尾虎爪。號曰螻蛭。絜鉤似鳧。見則民悲。

夜夜

治在得賢。亡由失人。夜夜之來。乃致狡宥。歸之冥應。誰見其津。

螭龜

水員四十。潛源溢沸。靈龜爰處。掉尾養氣。莊生是感。揮竿傲貴。

晏胡精精獸給給魚

晏胡之狀。似麋魚眼。精精如牛。以尾自辨。給給所潛。厥深無限。

揭狙獸魁雀

揭狙狡獸。魁雀惡鳥。或狼其體。或虎其爪。安用甲兵。擾之以道。

芭木

馬維剛駿。塗之芭汁。不勞孫陽。自然閑習。厥術無方。理有潛執。

苾魚薄魚

有魚十身。蘄蕪其臭。食之和體。氣不下溜。薄之躍淵。是維災候。

合蘇

猪身人面。號曰合。厥性貪殘。物為不咀。至陰之精。見則水雨。

當康獸鰓魚

當康如豚。見則歲穰。鰓魚鳥翼。飛乃流光。以出殊應。或災或祥。

蜚

蜚則災獸。跂踵厲深。會所經涉。竭水槁林。稟氣自然。體此殃淫。

中山經圖讚

桃林

桃林之谷。實惟塞野。武王克商。休牛風馬。阮越三塗。作嶮西夏。

鳴石

金石同類。潛響具韞。擊之雷駭。厥聲遠聞。苟以數通。氣無不運。

旋龜人魚修辟

聲如破木。號曰旋龜。修辟似龜。厥鳴如鵠。人魚類歸。出於洛伊。

帝臺棋

茫茫帝臺。維靈之貴。爰有石棋。五彩煥射。觴禱百神。以和天氣。

若華馬酸草

療瘧之草。厥實如瓜。馬酸之葉。三成黃華。可以為毒。不畏蛇蛇。

薑草

薑草黃華實如菟絲。君子是佩。人服媚之。帝女所化。其理難思。

山膏獸黃棘

山膏如豚。獸性好罵。黃棘是食。匪子匪化。雖無貞操。理同不嫁。

三足龜

造物維均。靡偏靡頗。少不為短。長不為多。青能三足。何異鼃鼃。

嘉榮

靈維天精。動心駭目。曷以禦之。嘉榮是服。所正者神。用口腸腹。

天鰩牛傷文獸騰魚

牛傷鎮氣。天鰩弭噎。文獸如蜂。枝尾反舌。騰魚青班。處於達穴。

帝休

帝休之樹。啟枝交對。疎本少室。曾陰雲霽。君子服之。匪怨伊愛。

泰室

嵩維岳宗。華岱恒衡。氣通天漢。神洞幽明。巍然中立。眾山之英。

天漢一作元漢

栢木

爰有嘉樹。厥名曰栢。薄言采之。窈窕是服。君子維歡。家無反目。

茵草

茵草赤莖實如蓂蓂食之益智勿不自覺治齊生知功奇於學

鷗鳥

鷗之為鳥同羣相為時類被侵雖死不避毛飾武士兼厲以義

鳴蛇化蛇

鳴化二蛇同類異狀拂翼俱遊騰波漂浪見則竝哭或淫或亢

赤銅

昆吾之山名銅所在切玉如泥火災有彩尸子所歎驗之彼宰彼一作及

神薰池

泰逢虎尾武羅人面薰池之神厥狀不見爰有美玉河林如舊

神武羅

有神武羅細腰白齒聲如鳴珮以鑢貫耳司帝室都是宜女子

鵩鳥

鵩鳥似鳬翠羽朱目既麗其形亦奇其肉婦女是食子孫繁有

荀草

荀草赤實厥狀如管婦人服之練色易顏夏姬是艷厥媚三遷

馬腹獸飛魚

馬腹之物。人面似虎。飛魚如豚。赤文無羽。食之辟兵。不畏雷鼓。

神泰逢

神號泰逢。好遊山陽。濯足九州。出入流光。天氣是動。孔甲迷惶。

薊栢

薊栢白華。厥子如丹。實肥變氣。食之忘寒。物隨所染。墨子是歎。

橘櫟

厥苞橘櫟。奇者維甘。朱實金鮮。葉倩翠藍。靈巧是詠。以為美談。

狼

大駟之山。爰有狼草。青華白實。食之無夭。雖不增齡。可以窮老。

鮫魚

魚之別屬。厥號曰鮫。珠皮毒尾。匪鱗匪毛。可以錯角。無飾劓刀。

鳩鳥

鳩維毒魁。鳩鳥是噉。拂翼鳴林。草痒木慘。羽行隱戮。厥罰難犯。

椒

椒之灌植。實繁有倫。拂穎霜霜。朱實芬辛。服之不己。洞見通神。倫一本作榛

神靈圖計蒙涉靈

涉靈三脚。靈圖虎。示計蒙龍首。獨稟異表。升降風雨。茫茫渺渺。

岷山

岷山之精。上絡東井。始出一勺。終致滌冥。作紀南夏。天清地靜。

夔牛

西南巨牛。出自江岷。體若垂雲。肉盈千鈞。雖有逸力。難以揮輪。

嵯峨

邛崃峻嶺。其坂九折。王陽逡巡。王尊遲節。殷有三仁。漢稱三哲。

狔狼雍和狔獸

狔狼之出。兵不外擊。雍和作恐。狔乃流疫。同惡殊異。氣各有適。

雌

寓屬之才。莫過於雌。雨則自懸。塞鼻以尾。厥形雖隨。列象宗彝。

熊穴

熊山有穴。神人是出。與彼石鼓。象殊應一。祥雖先見。啟事非吉。

跂踵

青耕禦疫。跂踵降災。物之相反。各以氣來。見則民咨。實為病媒。

蛟

匪蛇匪龍。鱗彩炳煥。騰躍波濤。蜿蜒江漢。漢武飲羽。飲飛疊斷。

神耕父

清冷之水。在乎山頂。耕父是游。流光灑景。黔首祀崇。以弭災眚。

九鐘

峽崩涇竭。麟鬬日薄。九鐘將鳴。凌霜乃落。氣之相應。觸感而作。

嬰勺

夫離之山。有鳥似鵲。白身赤眼。厥尾如勺。維彼有斗。不可以酌。

獬

有獸虎爪。厥號曰獬。好自跳撲。鼓甲振奮。若食其肉。不覺風迅。

帝臺漿

帝臺之水。飲竭心柄。靈府是滌。和神養性。食可逍遙。濯髮浴泳。

狙如

狙如微蟲。厥體無害。見則興師。兩陣交會。物之所感。焉有大小。

帝女桑

爰有洪桑。生瀛淪潭。厥園五大。枝相交參。園客是採。帝女所蠶。

梁渠移即聞鱗獸駢駢鳥

梁渠致兵移即起災駢駢辟火物各有能聞鱗之見大風乃來

神于兒

于兒如人蛇頭有兩常遊江淵見於洞窟乍潛乍出神光惚恍

神二女

神之二女爰宅洞庭游化五江惚恍窈冥號曰夫人是維湘靈

飛蛇

騰蛇配龍因霧而躍雖欲登天雲罷陸莫材非所任難以久托

海外南經圖讚

自此山來蟲為蛇蛇號為魚

賤無定貴無常珍物不自物自物由人萬事皆然豈伊蛇鱗

羽民國

鳥喙長頰羽生則卵矯翼而翔龍飛不逐人維保屬何狀之反

神人二八

羽民之東有神司夜二八連臂自相羈駕晝隱宵出詭時淪化

謹頭國

謹國鳥喙行則杖羽潛於海濱維食紀拒實維嘉穀所謂濡泰

厥火國

有人獸體厥狀怪謫吐納炎精火隨氣烈推之無奇理有不熟

三珠樹

三珠所生素水之際翹葉栢疎美狀若瑩耀彩丹波自相霞映

載國

不蠶不絲不稼不穡百獸率儻羣鳥拊翼是號載民自然衣食

貫胸交脰歧舌國

鏐金洪爐灑成萬品造物無私各任所稟歸於曲成是見兆朕

不死國

有人爰處園丘之上赤泉駐年神木養命稟此遐齡悠悠無竟

鑿齒國

鑿齒人類實有傑牙猛越九嬰害過長蛇堯乃命羿蹇之壽華

三首國

雖云一氣呼吸異道觀則俱見食則皆飽物形自周造化非巧

焦僇國

羣籟舛吹氣有萬殊大人三丈焦僬尺餘混之一歸此亦僞如

長臂國

雙肱三尺體如中人彼曷為者長臂之民修脚是負捕魚海濱

狄山帝堯葬於陽帝嚳葬於陰

聖德廣被物無不懷爰乃殂落封墓表哀異類猶然矧乃華黎

視肉

聚肉有眼而無腸胃與彼馬勃頗相髣髴奇在不盡食人薄味

南方祝融

祝融大神雲駕龍驂氣御朱明正陽是含作配炎帝列位於南

海外西經圖讚

夏后啓

筮御飛龍果儻九代雲融是揮玉璜是佩對揚帝德稟天靈誨

三身國一臂國

品物流行以散混沌增不為多減不為損啟變難原請尋其本

奇肱國

妙哉工巧奇肱之人因風構思制為飛輪凌顙遂軌帝湯是賓

形天

爭神不勝。為帝所戮。遂厥形。天。臍口乳目。仍揮于戚。雖化不服。

女祭女戚

彼姝者子。誰氏二女。曷為水間。操魚持組。厥儷安在。離羣逸處。

鴛鳥鷓鴣

有鳥青黃。號曰鷓鴣。與妖會合。所集會至。類則鳥鵲。厥狀難媚。

丈夫國

陰有偏。陽無產理。丈夫之國。王孟是始。感靈所通。桑石無子。

女丑尸

十日竝燬。女丑以斃。暴於山阿。揮袖自翳。彼美誰子。逢天之厲。

巫咸

群有十巫。巫咸所統。經技是揆。術藝是綜。採藥靈山。隨時登降。

并封

龍過無頭。并封連載。物狀相乖。如驥分背。數得自通。尋之愈闕。

女子國

簡狄有吞。姜嫄有履。女子之國。浴於黃水。乃娠乃字。生男則死。

軒轅國

軒轅之人。承天之祐。冬不襲衣。夏不扇暑。猶氣之和。家為彭祖。

乘黃

飛黃奇駿。乘之難老。揣角輕騰。忽若龍矯。實鑒有德。乃集厥軔。

滅蒙鳥大運山雄常樹

青質赤尾。號曰滅蒙。大運之山。百仞三重。雄常之樹。應德而通。

龍魚

龍魚一角。似狸處陵。俟時而出。神聖攸乘。飛駕九域。乘雲上昇。

西方蓐收

蓐收金神。白毛虎爪。珥蛇執鉞。專司無道。立號西阿。恭行天討。

海外北經圖讚

無脊國

萬物相傳。非子則根。無脊因心。橫肉生魂。所以能然。尊形者存。

燭龍

天缺西北。龍銜火精。氣為寒暑。眼作昏明。身長千里。可謂至神。

一目國

蒼四不多。此一不少。於野冥昏。洞見無表。形遊逆旅。所貴維眇。

柔利國

柔利之人。曲脚反肘。子求之容。方此無醜。所貴者神。形於何有。

共工臣相柳

共工之臣。號曰相柳。稟此奇表。蛟身九首。恃力桀暴。終禽夏后。

深目國

深目類胡。但□絕縮。軒轅道降。數塞歸服。穿胸長脚。同會異族。

聶耳國

聶耳之國。海渚是縣。雕虎斯使。奇物畢見。形有相須。手不離面。

夸父

神哉夸父。難以理尋。傾沙逐日。遯形鄧林。觸類而化。應無常心。

尋木

眇眇尋木。生於河邊。疎枝千里。上干雲天。垂陰四極。下蓋虞淵。

跂踵國

厥形雖大。斯脚則企。跳步雀蹠。踵不闕地。應德而臻。歎塞歸義。

歐絲野

女子鮫人。體近蠶蚌。出珠匪甲。吐絲匪蛹。化出無方。物豈有種。
無腸國。

平三
無腸之人。厥體維洞。心實靈府。餘則外用。得一自全。理無不共。

兩山之間。三號曰平。爰有道玉。駿馬維青。視肉甘華。奇果所生。

駒駘

駒駘野駘。產自北域。交頸相摩。分背翹陸。雖有孫陽。終不能服。

北方禺彊

禺彊水神。面色黧黑。乘龍踐蛇。凌雲附翼。靈一立冥。立於北極。

海外東經圖讚

君子國

東方氣仁。國有君子。薰華是食。雕虎是使。雅好禮讓。禮委論理。

天吳

耽耽水伯。號曰谷神。八頭十尾。人面虎身。龍據兩川。威無不震。

九尾狐

青丘奇獸。九尾之狐。有道翔見。出則銜書。作瑞周文。以標靈符。

豎亥

禹命豎亥。青丘之北。東盡太遠。西窮邠國。步履宇宙。以明靈德。

十日

十日竝出。草木焦枯。羿乃控弦。仰落陽鳥。可謂洞感。天人懸符。

毛民國

牢悲海鳥。西子駭麋。或貴穴保。或尊常衣。物我相傾。孰了是非。

黑齒國雨師妾立股國勞民國

湯谷之山。國號黑齒。雨師之妾。以蛇掛耳。立股食驅。勞民黑趾。

東方句芒

有神人面。身鳥素服。銜帝之命。錫齡秦穆。皇天無親。行善有福。

海內南經圖讚

梟陽

歸歸怪獸。披髮操竹。獲人則笑。啓蔽其目。終亦號咷。反為我戮。

狌狌

狌狌之狀。形乍如犬。厥性識狌。為物警辨。以酒招災。自貽纒冒。

夏后啟臣孟涂

孟涂司巴聽訟是非。厥理有曲。血乃見。衣所請靈斷。嗚呼神微。

建木

爰有建木。黃實紫柯。皮如蛇纓。葉有素羅。絕陰弱水。義人則過。

氐人

炎帝之苗。實生氐人。死則復蘇。厥身為鱗。雲南是託。浮游天津。

巴蛇

象寶巨獸。有蛇吞之。越出其骨。三年為期。厥大如何。屈生是疑。

海內西經圖譜

貳負臣危

漢擊磐石。其中則危。劉生是識。羣臣莫知。可謂博物。山海乃奇。

流黃鄴氏國

城圍三百。連河北棟。動是塵昏。烝氣霧重。焉得遊之。以邀以縱。

大澤方百里

地號積羽。厥方百里。羣鳥雲集。鼓翅雷起。穆王旋軫。爰策驂耳。

流沙

天限內外。分以流沙。經帶西極。頽澹委蛇。注於黑水。永瀾餘波。

木禾

崑崙之陽。鴻鷺之阿。爰有嘉穀。號曰木禾。匪植匪藝。自然靈播。

開明

開明天獸。稟茲食精。虎身人面。表此桀形。瞪視崑山。威攝百靈。

文王玕琪樹

文王玕琪。方以類叢。翠葉倚姜。丹何玲瓏。玉光爭煥。彩艷火龍。

不死樹

萬物暫見。人生如寄。不死之樹。壽蔽天地。請樂西姥。烏得如羿。

甘水聖木

醴泉睿木。養齡盡性。增氣之和。祛神之冥。何必生知。然後為聖。

寔窳

寔窳無罪。見害貳員。帝命羣巫。操藥夾守。遂淪溺淵。變為龍首。

服常琅玕樹

服常琅玕。崑山奇樹。丹寶珠離。綠葉碧布。三頭是同。遞望遞顧。

海內北經圖譜

吉良

金精朱鬣。龍行駿蹄。拾節鴻驚。塵不及起。是謂吉黃。釋聖牖里。

蛇巫山鬼神蚰大羣帝臺大蜂朱蛾

蛇巫之山。有人操杯。鬼神蚰犬。主為妖災。大蜂朱蛾。羣帝之臺。

闢非據比尸祿戎

人面獸身。是謂闢非。被髮折頸。據比之尸。戎三其角。祿豎其眉。

騶虞

怪獸五彩。尾參於身。矯足千里。儵忽若神。是謂騶虞。詩歎其仁。

冰夷

稟華之精。練食石八。乘龍隱淪。往來海若。是謂水仙。號曰河伯。

王子夜尸

子夜之尸。體分成七。離不為疎。合不為密。苟以神御。形歸於一。

宵明燭光

水有佳人。宵明燭光。流耀河濤。稟此奇祥。維舜二女。別處一方。

列姑射山大蟹陵魚

姑射之山。實栖神人。大蟹千里。亦有陵鱗。曠哉溟海。含怪藏珍。

蓬萊山

蓬萊之山。玉碧構林。金臺雲館。臨哉獸禽。實維靈府。王主甘心。
海內東經圖讚

郁州

南極之山。越處東海。不行而至。不動而改。維神所運。物無常在。

韓鵬始鳩雷澤神瑯瑯臺

韓鵬始鳩在海之州。雷澤之神。鼓腹優游。瑯瑯焦亮。邈若雲樓。

豎沙居繇塢端璽喚國

豎沙居繇塢端璽喚。沙漠之鄉。絕地之館。或羈於秦。或署於漢。

大江北江南江浙江廬淮相漢濛溫潁汝涇渭白沅顓泗鬱肆潢洛汾沁濟潯虢沱漳水
川瀆交錯。渙瀾流帶。通潛潤下。經營華外。殊出同歸。混之東會。文一作綺

補遺

封豕

有物貪婪。號曰封豕。薦食無厭。肆其殘毀。昇乃飲羽。獻帝效伎。

鼉鼉

鼉之為鼉。食烟棲林。戴飛戴乳。乍獸乍禽。皮籍孕婦。人為大任。

弱水

弱出崑山。鴻毛是沈。北淪流沙。南映火林。惟水之奇。莫測其深。

都廣之野

都廣之野。珍怪所聚。爰有美穀。鸞歌鳳舞。后稷託終。樂哉斯土。

猩猩

能言之獸。是謂猩猩。厥狀似猴。號音若嚶。自然知往。頗測物情。

若木

若生之木。崑山是濱。朱華電照。碧葉玉津。食之靈知。為力為神。

翡翠

翠雀麋鳥。越在南海。羽不供用。肉不足宰。懷璧其罪。賈害以采。

欺冬

吹萬不同。陽煦陰蒸。欺冬之生。擢穎堅冰。物休所安。焉知渙凝。

鬼草

焉得鬼草。是樹是蔬。服之不憂。樂天儀世。如波滾舟。任波流滯。

蟒蛇

蠢蠢萬生。咸以類長。惟蛇之君。是謂巨蟒。小則數尋。大或百丈。

枳首蛇

變稱一足蛇則二首。少不知無多不覺有。雖資天然無異駢拇。

鰐魚

鰐之為狀半鳥半鱗。形如鷄鯉。食之已疣。

飛魚

飛魚如豚。赤文無羽。服之不雷。可以禦兵。

焦堯

焦堯極麼。靖人唯小。四體具足。鬚眉才了。

釋天地圖讚

祭地肆瘞。郊天致煙。氣升太一。精淪九泉。至敬不文。明德惟鮮。

星圖

茫茫地理。粲爛天文。四靈垂象。萬類羣分。眇觀六沚。咎徵惟君。

炎山

水含陽氣。精構則燃。焚之無盡。是生火山。理見乎微。具妙在傳。

筆

上古結繩。易以書契。經緯天地。錯綜羣執。日用不知。功蓋萬世。

龜

天生神物。十朋之龜。或游於火。或遊於著。雖云類殊。象二一歸。疊疊致用。極數盡幾。

蚌

萬物變蛻。其理無方。雀雉之化。含珠懷璫。與月盈虧。協氣晦望。

螢火

蟲之精絜。可貴惟蟬。潛蛻棄穢。飲露恒鮮。萬物皆化。人胡不然。

熠燿。宵行。蟲之微公。出自腐草。烟若散漂。物之相與。孰知其陶。

茅苴

車前之草。別名茅苴。王會之云。其實如李。名之相亂。在乎疑似。

杜若

蘼蕪。善草。亂之蛇床。不隕其實。自別以芳。佞人似智。巧言如簧。

芙蓉

芙蓉麗草。一曰澤芝。泛葉雲布。照波赩熙。伯陽是食。饗比靈期。

麻

草皮之良。莫貴於麻。用無不給。服無不加。至物在邇。求之好遫。

珪

玉作五瑞。辯章有國。君子鳴佩。亦以表德。永觀厥祭。時惟文則。
尺蠖

貴有可賤。賤有可珍。嗟茲尺蠖。體此屈伸。論配龍蛇。見歎聖人。

菊

菊名白精。布華玄月。仙客薄采。何憂華髮。

萍

萍之在水。猶卉植地。靡見其布。漠爾鱗被。物無常託。孰知所寄。

卷施

卷施之草。拔心不死。屈平嘉之。諷詠以比。取類雖爾。興有遠旨。

螳螂

螳螂飛蟲。揮斧奮臂。當轍不廻。可踐可避。勇士致斃。厲之以義。

麟

麟惟靈獸。與麇同體。智在隱蹤。仁表不抵。孰為求哉。宣尼揮涕。

比肩獸

蟹與蚶虛。乍兔乍鼠。長短相濟。彼我俱舉。有若自然。同心共膂。

鼎

九牧貢金。鼎出夏后。和味養賢。以無化有。赫赫三事。鑒於覆餗。

金銀

惟金三品。揚越作貢。五材之珍。是謂國用。務經軍農。爰及雕弄。

柚

厥苞橘柚。精者曰甘。實染繁霜。葉鮮翠藍。屈生嘉歎。以為美談。

梧桐

桐實嘉禾。鳳凰所棲。爰及琴瑟。八音克諧。歌以永言。雍雍喈喈。

燕

燕燕于飛。瑞娥以卵。玄玉爰發。聖敬日遠。商人是頌。詠之弦管。

馬

馬出明精。祖自天駟。十閑六種。各有名類。三才五御。駕駿異轡。

豹

書稱猛士。如虎如豹。豹蓋豹屬。亦曰執夷。白狐之云。自是而非。

鼯鼠

有鼠豹彩。厥號為鼯。漢朝莫知。郎中能名。賞以束帛。雅業遂盛。

鼯鼠

小鼠曰鼯實有故蓋乃食郊牛不恭是告厥譴惟明徵乎且覺
鼯鼠

五能之鼠技無所執應氣而化翻飛駕集詩人歌之無食我粒

山海經圖讚終

山海經補註

成都楊慎撰

南山經

鵲山

舊本作鵲。近刻本改作鵲。此等古字宜存之。甚矣今人之妄也。

援翼之山

援豈有翼哉。言此山之險而難登。援亦須翼。諺所謂胡孫愁也。

賁爰之山。有獸焉。狀如狸而有髦。其名曰類。自為牝牡。今雲南蒙化府有此獸。土人謂之香髦。具兩體。二十八宿真形圖。心房二宿皆具兩體。星禽家演房宿為兔。心宿為狐。今之兔有雌無雄。擇目而孕。狐有兩體。故能媚惑。賁爰之類。自為牝牡。又何疑焉。再考此獸類名。益種無異同。雄亦類雌。雌亦類雄。類字之義。愈益可明。許氏說文云。犬多相類。故類字從犬。非也。犬亦有食犬。吠犬。獵犬之分。其色又別。何得言相類乎。古人制字。凡獸多從犬從牙。未必盡取義也。

浮玉之山。北望具區。

浮玉山即金山也。唐明皇改浮玉山為金山。前人詩云。天將白玉浮諸水。帝以黃金姓此山。

成山四方而三壇。閼水出焉。

閼音源而南流。注於辟勺。辟音呼勺或作多

按庠勺即庠沱也。古今字異耳。况多之音與沱相近無疑。滹沱有南有北。此南滹沱也。其字古書所載。例無定體。山海經作庠勺。又作庠多。此南也。作灌池。北滹沱也。說文作滹池。而引詩滹池。北流。今誤作滹池。水經作滹池。秦詛楚文作亞沱。字林作滹沱。周禮作庠池。史記作滹池。九州記作滹沱。禮記作呼池。注作惡池。

洵山。洵水出焉。而南流注於閼之澤。其中多此蠃。

紫色螺也

螺色白。磨之則紫文生。余親見之。

漆吳之山。處於海東。其光載出載入。是為日次。

郭注云。神光之所潛曜。是日景之所次舍。山海經載日月所出入之山凡數十。蓋峰巒隱映。壑谷層疊。所見然矣。非必日月出沒定在是也。史記云。崑崙山。日月所隱蔽。以為光明者也。曹孟德樂府。日月之行。若出其中。星辰粲爛。若出其裏。孟郊終南山詩。日月石上生。幽谷夜光明。是也。

侖者之山。有木焉。其狀如穀而赤理。其汗如漆。其味如飴。可以釋勞。其名曰白蓉。可以血玉。

郭璞云。或作罽。蘇罽。蘇一名白蓉。見廣雅。音羔。血可染玉。作光彩。慎按罽即皋字。董仲舒春秋繁露云。皋蘇釋勞。即此也。荀子亦有罽芷之文。罽。皋蘇也。芷。白芷也。血玉之說。則未試。

西山經

錢來之山。其下多洗石。

郭云漂洗可以破體去垢垢初兩切音甲去

松果之山。濩水出焉。有鳥焉。其名曰鵽音渠。其狀如山雞。黑身赤足。可以已膝。

鵽渠即鵽渠。南中通海縣有之。名曰鵽雞。舊註音形謬。

小華之山。其草多萆荔。

即薜荔也。舊註音戾非。

蟠冢之山。其上多桃枝鉤端。桃枝今名桃竹。實心多節。可以為杖。又為簞鉤。端簾也。其色紅。可以束物。有草焉。其本如桔梗。黑華。

而不實。名曰骨蓉。食之使人無子。今名花骨空。凌霄花之類。

皋塗之山。其陰多銀黃。舊無註。

銀黃。漢代用以為佩。唐太宗賜房元齡銀黃帶。宋人小說云。其物貴於黃金。

隗山。音巍。隗一音。隗是鐔于西海。鐔猶堤埧也。章聞切。其中多采石。采石有彩色者。今隗黃空青綠碧之屬。

慎按穆天子傳。天子至於重鎰氏之黑水。爰有采石之山。凡好石之器。於是乎出。又云。重鎰氏其先三苗。天子舍於珠澤。注珠澤在越雋。又水經注。若水旁有光珠之穴。采石即彩石也。

采石山光珠穴。疑即今寶山寶井。今其地產寶石。其品有紅刺紫刺軟紅硬紅酒黃祖母綠。

其價有百倍黃金者。甚為方慝。亦妖物也。

數歷之山。楚水出焉。其中多白珠。今蜀郎平澤出青珠。

左思蜀都賦云。青珠黃環是也。

女牀之山其陰多石涅

石涅可以染黑色論語曰涅而不緇即此物也又可以書字謂之石墨上古用漆書中古用石黑書今代用煙墨不知石墨為何物矣本草黑石脂一名石涅又名元丹又名黑丹。崆山其上多丹木其味如飴食之不饑丹水出焉其中多白玉是有玉膏玉膏所出以灌丹木丹木五歲五色乃清五味乃馨黃帝乃取崆山之玉榮堅栗精密濁澤而有光五色發作以和柔剛天地鬼神是食是饗君子服之以禦不祥

崆音密崆山不知所在觀其說似莊子之說建德華胥列子之談壺領圓嶠後世之記天台桃洞也

槐江之山實惟帝之平圃南望崑崙其光熊熊其氣魂魂其中多玉其陰多榘木之有若

榘木大木也國語曰榘木不生花是也尸子曰大木之有奇靈者為若木凡大木至百圍年歷千載皆有奇靈不獨扶桑得稱若木耳又曰食若木者多為仁人

東望恒山四成成亦重也爾雅云再成曰英也窮鬼居之各在一搏

搏猶脅也韓退之送窮文實行此一句

長留之山其神白帝少昊居之惟員神魄音氏之宮是神也主司反景

日西入則景反東照故曰反景揚雄賦所謂倒影也尚書宅西曰昧谷音昧賡納日古文昧谷作柳谷鄭元曰五色聚為柳日入時具五色說文穀音日入色也尚書賡日柳谷屬之仲秋

山海經司反景亦居之白帝皆倒景反照在秋為多其變千狀有作胭脂紅者諺所謂日沒胭脂紅無雨必有風也有如金縷穿射者古詩所謂日脚射空金縷直西望千山萬山赤也凡乍雨乍霽戴霞戴陰雲氣班駁日光穿漏其中必有蛟龍隱見是則所謂神司反景也

天上有神焉其狀如黃囊赤如火六足四翼渾沌無面目是識歌舞實惟帝江也此豈因古昔用瞽人為樂官而傳會其說乎或者實有此物而因以瞽人為樂師乎

朔暗山神薳收居之是山也西望日之所入其氣員

紅光之所司也 晉天文志東海氣如圓空

白於之山洛水出於其陽而東流注於渭

括地志白於山在慶州洛源縣 洛有二此秦中之洛也伊洛之洛其源出熊耳前漢書云

洛出重瑩

鳥鼠同穴之山

此即禹貢所紀導渭之山也鳥鼠同穴今陝西人實云有之自修撰正成邊時親見之宋人作書傳乃以鳥鼠為一心同穴為一山意欲附於不語怪而不知其妄可笑也

濫水西流注於漢水多鯨鯢之魚上音如其狀如覆鉢鳥首而魚翼魚尾音如磬石之聲是生

珠玉

郭云亦珠母蚌類 文選所謂鳥磬字璆

北山經

單狐之山。多機木。

郭云。機木似榆。可燒以糞稻田。出蜀中。慎按。即今之檜也。

譙明之山。譙水出焉。其中多何羅之魚。一首而十身。今名八帶魚。

隄山。隄水出焉。隄或作隄。古字耳。

北次二。經之首。在河之東。其首枕汾。其名曰管涔之山。山海經皆先書山名。此山獨變文亦奇筆也。

縣甕之山。古文甕。其獸多閭。

閭即羴也。似驢而歧蹄。角如廬羊。一名山驢。汲冢周書曰。北唐以閭。鄉射禮。國君射於郊。則

閭謂以閭皮為侯也。縣甕山今在晉陽。

白沙山。廣圓三百里。盡沙也。

世傳六一公作醉翁亭記。始云。滁四面皆有山。又改云。滁為州。山四周。又改云。未乃改云。

環滁皆山也。可謂簡而奇。然山海經已有此語。如隴岡阡表。求其生而不得。下數轉語。出孔

叢子。學古文者。豈可不讀古書乎。

梁渠之山。有鳥焉。名曰鷩。其音如鵲。食之止衄。

郭云。治洞下也。音洞。胡元名巷曰胡動。經世大典作衄衄。亦善。傅會古字矣。彼犬羊焉。知

之。中國文人為粉飾耳。然而元人字學高於宋人多矣。

馬成之山有獸焉其狀如白犬而黑頭見人則飛其名曰天馬其鳴自計

郭云言肉翅飛行自在在天為勾陳在地為天馬五行家有其目而不知其物也文人所
用天馬行空之語亦指此爾

天池之山有獸其狀如兔而鼠首以其背飛其名曰飛鼠

郭云用其背上毛飛飛則仰也此即文選所謂飛蠅雲南姚安蒙化有之余所親見也其
肉可食其皮治難產

教山教水出焉西流注於河是水冬乾而夏流實惟乾河

郭云今河東聞喜縣有乾河口但有故溝無復水是也今在陝州唐名石壕杜子美詩有

石壕吏一首今者乾壕鋪教即穀也秦晉戰於穀即此地兩山則穀之南北兩嶽也夏后

皋墓文王避雨陵在焉見公羊傳

景山南望盭敗之澤北望少澤其上多草諸蕒

景山即毛詩景山也諸蕒即今山藥諸蕒有二種此草諸蕒也中山經其不多諸蕒蓋本諸

蕒也

其草多秦椒

秦椒今名地椒狗獐羊食之故味比他羊為美

謁戾之山在上沁水出焉南流注於河出穀述縣其東有林焉名曰丹林丹林之水出焉

丹林今之懷慶清化鎮柿林百里故曰丹林實北地之上腴太行之穠秀也丹水在懷慶實帶府城

神囷之山。滏水出焉。

囷音如倉囷之囷。滏水在今磁州。

泰巖之山。滏沱之水出焉。

注。今滏沱水出鴈門鹵城縣南武天山。古本作灌池。滏沱後人改也。

燕山多嬰石。

郭云。言石似玉。有符彩嬰帶。所謂燕石者。今此石出保定之滿城縣。

倫山有獸其狀如麋其川在尾上其名曰熊。

郭云。川竅也。按伯樂馬經云有馬白州。州當是川字。以此可證。

鷄號之山其風如鷄。
鷄急風貌音戾他本引此或作鷄

東山經

竹山鐔於江

鐔于江形如鐔也與管涔之山其首枕汾用字相類。

嶧皋之水其中多蜃玼。

蜃蚌也玼玉玼亦蚌屬。宋人謂之江瑤柱。今登萊廣閩皆有之。

流沙百里曰非姑射之山

括地志有南姑射山北姑射山亦猶語有南語北語潞有東潞西潞也

硯反真山有獸焉其狀如馬而羊首四角牛尾其名曰筱筱音見則其國多狡客嘉人

無鼻之山南望幼海即少海也東望榑木

郭云扶桑二音慎按鄭元注禮記不改本字而音其下郭璞注山海經亦不改本字而音其下深得聖人闕文之義宋人則直改之矣章句且顛倒况字與音乎

中山經

青要之山實維帝之密都颺神武羅司之其狀人面而豹文小腰而白齒而穿耳以鑠其鳴如鳴玉是山也宜女子

淮南子云青腰玉女降霜神也蓋本此說而傳會之

姑媯之山媯音帝女死焉化為萑草其葉胥成服之媚於人

注一名荒夫草楚國先賢傳云帝之季女名曰瑤姬精魂化草實為靈芝亦此類也

龜山多扶竹

注印竹也高節實中中杖也名之扶老竹陶潛歸去來辭策扶老以流憩即此杖也又見

蔡順傳注

暴山多麝就

磨即麀也。就即驚也。

海外南經

羽民國有神人二八連臂為帝司夜於此野。

注。晝隱夜見。南中夷方或有之。夜行逢之。土人謂之夜游神。亦不怪也。

海外西經

大樂之野。夏后啟於此儻九代。

注。九代馬名。儻謂盤作之令儻也。

盤作之謂舉盤起之。令馬儻其上。杜詩。舞馬更登床。唐

世猶有此戲。

玉空邊等為環。

郭注

謂玉空其中而等其邊。肉好均也。玉之內孔曰肉。外美曰好。古玉有肉倍好者。有好倍肉者。

環則肉好兩均。所謂玉空邊等也。

有喬國。今使家喬人。蓋象此也。

郭注

喬人。雙木續足之戲。今曰躡蹻。

海外北經

有一蛇。虎色。首衝南方。

首衝南方者。紀鼎上所鑄之像。虎色者。蛇斑如虎。蓋鼎上之像。又以彩色點染別之。

夸父與日逐走入日

逐音胄。郭璞讀。

歐絲之野。一女子踞據樹歐絲。

郭云言噉桑而吐絲。若蠶類也。

世傳蠶神為女子。謂之馬頭娘。後漢志曰宛蠶。蓋此類也。

平邱在三桑東。爰有遺玉青鳥視肉楊柳甘胆甘華。

遺玉即堅玉也。松枝千年為茯苓。又千年為琥珀。又千年為堅。字書云堅。遺玉也是其解也。

高昌人名為木堅。謂元木為元堅。甘華即積枸。一名木蜜。俗名蜜瓜。

海外東經

帝命豎亥步自東極至於西極。五億十選九千八百步。豎亥右手把算。左手指青邱北。

選萬也。選與萬古音相通。遂借其字。右手把算。左手指青邱。亦言鑄象也。

立股之國。其為人衣魚食鰩。在雨師妾北。

驅即鰩。衣魚食鰩。蓋水中國也。雨師亦有妾哉。文人好奇。如說姮娥織女宓妃之類耳。

海內南經

甌居海中。

即東甌也。在岐海中。岐海。海之岐流也。猶云裨海。

閩在海中。

閩越即西甌亦在岐海中。閩已見此近修閩志乃不知引此而妄加杜撰。
有求其狀如牛引之有皮若纓黃蛇其葉如羅其實如藥其木若菰其名曰建木。

藥作丸謂員如鳥彈也。

海內西經

流沙者形如月生五日也。

文係郭注

謂形如半月也。唐詩江畔洲如月。

崑崙之墟帝之下都在八隅之巖赤水之際非仁羿莫能上岡之巖。

郭注言非仁人及有才藝如羿者不得登。古謂有才藝者為羿非必指有窮之君也。

玕琪赤玉屬也。吳天璽元年臨海郡吏伍曜在海邊得石樹高三尺餘莖葉紫色詰曲傾靡有光彩。

按此即珊瑚樹。

莊子有人三頭遮目遮起以伺琅玕與玕琪子。

文係郭注

按今莊子本無此文。

海內北經

犬封國曰犬戎國狀如犬有一女子方跪進杯食。

注槃瓠殺戎王高辛以美女妻之生男為狗女為美人。

今雲南百夷之地女多美其俗。

不論貴賤人有數妻妻妾事夫如事君不相妬忌夫就妾宿雖妻亦反服役之云重天主也
進食更衣必跪不敢仰視近日姜夢賓為兵備親至其地歸戲謂人曰中國稱文王妃后不
妬百夷之婦家家文王妃后也跪進杯食蓋紀其俗

林氏國有珍獸大若虎五彩畢具尾長於身名曰騶吳一作蘇乘之日行千里

即騶虞也

列姑射在海河洲中

山名即莊子所謂藐姑射之山也

姑射國在海中

東山經流沙百里曰北姑射山又南三百里曰南姑射山皆在中國此曰藐姑射蓋言遠在海中也
大蟹在海中

郭注蓋千里之蟹也汲冢王會篇海陽人貢大蟹其殼專車此云千里蟹則又大矣嶺
南異物志昔有海商海中行遇洲渚林木茂甚乃維舟登岸繫於水傍半炊而林沒急斷纜
乃得去詳視之大蟹也又玄中記曰天下之大物北海中之蟹能舉螯如山其舟故在水
又嶺表錄異嘗有人浮南海泊於孤岸忽有一物如蒲帆飛過海將近舟舟人競以物擊
之如帆者盡碎墮舟視之乃蛟蜃也去其翅足秤之得肉八十斤噉之甚肥美蜃有八十斤
則蟹大千里亦有之矣

明組邑居海中。

爾雅云。綸似綸。組似組。東海有之。注海苔之類。此所謂明組者也。

大人之市在海中。

即今登州海市。

海內東經

洞庭地穴也。在長沙巴陵。今吳縣南太湖中有包山。下有洞庭穴。潛行水底。云無所不通。號為

地脉。郭注

按河圖絳象注云。太湖中洞庭山。林屋洞庭。即禹藏真文之所。一名包山。吳王闔閭登包之上。命龍威丈人入包山。得書一卷。凡一百七十四字而還。吳王不識。使問仲尼。詭云。赤烏啣書以授玉。仲尼曰。昔吾遊西海之上。聞童謠曰。吳王出遊。觀震湖。龍威丈人名隱居。北上包山。入靈墟。乃造洞庭。竊禹書。天帝大文不可舒。此文長傳六百年。今強取出。喪國廬。邱按謠言。乃龍威丈人洞中得之。赤烏所啣。非邱所知也。吳王懼。乃復歸其書。唐張說洞庭詩。地穴穿東武。江流下西蜀。

白水出蜀。而東南注江。

郭注。色微白濁。今在梓潼白水縣。源從臨洮之西傾山來。經沓中。東流通陰平。至漢壽縣入潛。即水經所謂天池白水也。

沅水出象郡。入下雋西。

雋古音昨。衆反。今音剪。

潦水出衛皋東。

即潦水也。

大荒東經

少昊之國。少昊孺。一本有顓頊於此。

郭云。孺義未詳。今按孺謂長育之也。別無異義。郭蓋以奇求之。反不得耳。

大荒之中。有山名曰大言。日月所出。

按山海經紀。日月之出者七。日月所入五。日月所出入一。其紀日月之出也。曰大言山。曰合

虛山。曰明星山。曰鞠陵山。曰湯谷扶木。曰猗天蘇門山。曰壑明俊疾山。皆在大荒東經。其紀

日月之入。曰豐沮玉門山。曰日月山。天樞也。曰鑿鑿。鑿鑿一本作鉅山。曰常陽山。曰大荒山。皆在

大荒西經。曰浴日一。在大荒南經之甘淵。曰浴月一。在大荒西經之玄丹山。其紀日月所出

入一。在大荒西經之方山。柜格之松馬。考之淮南子。日所出入又多不同。存而不論可也。

犂鞬之尸。

古靈字。或從巫。或從玉。或從鬼。或從粥。

有白民之國。帝俊生帝鴻。帝鴻生白民。白民銷姓黍食。

銷姓者。所賜其國之姓也。

是維嬴土之國。

言行沃豐盈也。土音杜。

帝俊生黑齒。姜姓。黍食。

凡言生者。未必其親所產。尚書舜別生分類。生之為言姓也。蓋賜之姓而別其種類。相傳既久。彼後世自以為聖帝之苗裔也。如今雲南永邦孟養之夷。云天皇帝是我兄之類。古者五胡皆自以為聖帝之後。匈奴自謂天之驕子。元魏謗天嗣。自謂天女所生。不難於証天。況聖人乎。

東海之渚中。有神人面鳥身。珥兩黃蛇。踐兩黃蛇。名曰禺疆。

魑即魍。說文云。夔神魑也。黃帝以夔皮鞀鼓。聲聞五百里。因刻夔形為鼓簏。故穆天子傳有黃蛇翼鼓之文。

帝舜生戲。戲生搖民。

今廣西有徭民。豈即此耶。

女丑有大蟹。

郭云。廣千里也。天文有巨蟹宮。蓋應此。

三騅視肉。

郭云緊肉有眼。按視肉之文。山海經屢見。郭惟此有解。又云食之不盡。皆不可曉。缺之可也。

大荒南經

汜天之山。赤水窮焉。

郭云流極於此山也。此篇又有不庭之山。榮水窮焉。成山。甘水窮焉。不姜之山。黑水窮焉。殤音塗之山。青水窮焉。

三身之國。姚姓黍食。

黍食猶言大食也。他如盈民之國。於姓黍食。不死之國。阿姓甘木是食。蚺民之國。桑姓食黍。焦僿之國。幾姓嘉穀是食。又有鼬姓之國。大荒北經則有毛民之國。依姓食黍。澹耳之國。任姓食穀。胡不與之國。烈姓黍食。深目之國。盼姓食魚。魚山。威姓食黍。苗民。釐姓食肉。夷狄豈有姓哉。蓋禹錫土姓而覃及四裔也。書所謂聲教訖海。此亦可證。今南中夷人有合國同一姓者。其遺俗乎。其曰食木葉食魚食木實。王制所云不火食者也。

有羲和之國。有女子名曰羲和。

方一本有字浴於甘淵。

郭云羲和蓋天地始生主日月者也。其後世遂為此國作日月之象而掌之。沐浴運轉之於甘水中。以效其出入湯谷虞淵也。河圖緯象曰。邠之隘上為扶桑。日所升。宣陸之阻下為吳泉。月所登。漢武帝昆明池中。左牽牛而右織女。象雲漢之逶迤。蓋效此耳。

大荒西經

白丹青丹。

注。又有黑丹也。孝經援神契云。王者德至山陵而黑丹出。然則丹者別是彩色名。亦猶黑白黃皆云丹也。尚書大傳云。丹邱出丹腹。青邱出青腹。是丹與青皆名腹。亦猶今俗名黑墨朱墨也。黑丹即黑石脂。石涅也。此篇又有元丹之山出黑丹。

有人反臂。名曰天虞。有女子方浴月。

與浴日義同。其曰帝俊之妻生十日。自甲至癸也。生月十又二。自子至亥也。

有赤犬名曰天犬。其所下有兵。

注引周書云。天狗所止地盡傾。餘光燭天為流星。吳楚反時。吠過梁國。元至正中。雲南玉。

案山下有赤犬羣吠。未幾兵亂。

風道北來。天乃大水泉。

道猶從也。韓非子云。元鶴二八道南方而來。

蛇乃化為魚。

禮記水淖至不獻魚。鼈王充云。是水至蛇新化為魚。鼈恐傷人也。是

謂魚婦死即復蘇。

淮南子云。后稷龍在建木西。人死復蘇。其中為魚。今南中百夷能以術呪尸為魚而食之。

大荒北經

亦在畏獸畫中。

郭注。

據山海圖為說也。

夸父不量力。欲追日影。逮之於禺谷。

禺谷即虞淵。古人用字。例以同音相借。虞淵又作吳泉。

有人衣青衣。名曰黃帝女魃。蚩尤作兵伐黃帝。黃帝乃令應龍攻之冀州之野。應龍蓄水。蚩尤請風伯雨師縱大風雨。黃帝乃下天女曰魃。雨止。遂殺蚩尤。魃不得復上。所居不雨。

阮嗣宗詩。應龍沉冀州。妖女不得眠。乃用此事。

西北一本有字海之外。赤水之北。有神人面蛇身而赤。其暝乃晦。其視乃明。風雨是謁。是燭九陰。是謂燭龍。

三是字。古文法。奇之又奇。

海內經

西南黑水之間。有都廣之野。后稷葬焉。

注。其城方三百里。蓋天下之中。素女所出也。此蓋郭璞別以異聞增入之也。黑水廣都。今之成都也。素女在青城天谷。今名玉女洞。

爰有膏穀。膏稻。膏黍。膏稷。

嘉穀之米。炊之皆有膏。

百穀自生。冬夏播。棊。

棊。今本誤改作穀。齊民要術所引可證。

西南有巴國其域中方三百里其出是塵土

注今三巴是出是塵土言其地清曠無罽埃也長寧侯子啓忠與子相遇於巴東其詠巴峽詩有冰壺浸兩儀之句子擊節賞之侯曰此句亦微有祖子知之乎予曰豈非用山海經巴國域中出是塵土乎侯笑曰是也

又有黑人虎首鳥足兩手持蛇方啗之

今南中有夷名娥昌其人手持蛇啗之其採樵歸籠中捕蛇數十蛇亦不能去不知何術也疑即此類

賈超之山其草多龍修

郭云龍湫也生石穴中而倒垂可以為席鄭緝之東陽記仙姥巖下不生蔓草盡出龍湫

神異經目錄

東荒經

東南荒經

九則

五則

南荒經

西南荒經

十二則

三則

西荒經

西北荒經

九則

六則

北荒經

東北荒經

三則

一則

中荒經

十則

九行

八行

七行

六行

五行

四行

三行

二行

一行

零行

共計

九行

八行

七行

六行

五行

四行

三行

二行

一行

零行

共計

神異經

漢 東方朔撰

東荒經

東荒山中有大石室東王公居焉長一丈頭髮皓白人形鳥面而虎尾戴一黑熊左右顧望恒

與一玉女投壺每投千二百矯矯按仙傳拾遺矯字作景設有入不出者天為之嚙噓嚙華曰矯出而脫悞不

接者言失天為之笑華云言笑者天口流火炤灼今天上不雨而有電光是天笑也

東方有人焉男皆朱衣縞帶元冠女皆采衣男女便轉可愛恒恭坐而不相犯相譽而不相毀

見人有患投死救之名曰善人俗云土人一名敬敬一名美俗云不妄言嘿嘿然而笑倉卒見之

如癡俗云善人如癡此之謂也

東方荒外有豫章焉此樹主九州其高千丈圍百尺本上三百丈本如有條枝數張如帳上有

玄狐黑猿枝主一州南北竝列面向西南有九力士操斧伐之以占九州吉凶斫之復生其州

有福創者州伯有病積歲不復者其州滅亡亡者州伯死復者木創復也

東方有桑樹焉高八十丈數張自輔其葉長一丈廣六七尺其上自有蠶作繭長三尺繅一繭

得絲一斤有椹焉長三尺五寸圍如長

東方有樹焉高百丈數張自輔葉長一丈廣六尺其名曰梨如今之櫨梨但樹大耳其子徑三

尺剖之少瓤曰如素和羹食之為地仙衣服不敗辟穀可以入水火一名木梨

東方有樹高五十丈葉長八尺名曰桃其子徑三尺二寸和核羹食之令人益壽增按別本作壽短誤

核中仁可以治嗽小桃溫潤嘔嗽人食之即止增按別本作嘔嗽人肉滑者誤

東海之外荒海中有山焦炎而峙高深莫測蓋稟至陽之為質也海中激浪投其上噲然而盡

計其晝夜噲攝無極若熬鼎受其酒汁耳

大荒之東極至鬼府山臂沃椒山

增按中記云天下之疆者東海之惡焦馬水灌而不已脚惡焦山名在東海南方三萬里海水灌之即消即沃椒也

巨洋海中昇載海日蓋扶桑山有玉雞玉雞鳴則金雞鳴金雞鳴則石雞鳴石雞鳴則天下之

雞悉鳴潮水應之矣

東海滄浪之洲生彊木焉洲人多用作舟楫其上多以珠玉為戲物終無所負其木方一寸可

載百許斤縱石鎮之不能沒

東方荒中有木名曰栗其殼徑三尺三寸殼刺長丈餘實徑三尺殼亦黃其味甜食之多令人

短氣而渴

增按太平御覽引此云東北荒有栗樹高三十丈栗徑三尺其殼赤其肉黃白味甘食之令人短氣而渴廣記所引出西陽記

東方裔外有建山其上多橘柚

東南荒經

東南方有人焉周行天下身長七丈

增按說邪所引作七尺誤

腹圍如其長頭戴雞父魃頭增按華曰魃煩亂也

朱衣鵠帶以赤蛇繞額

一作惡蛇繞頂

尾合於頭不飲不食朝吞惡鬼二千暮吞三百此人以鬼為飯

增按廣記飯作以靈為漿廣記作靈

名曰尺郭一名食邪道師云吞邪鬼一名赤黃父今世有黃父

鬼

東南荒中有邪木高三千丈。或十餘圍。或七八尺。其枝喬直上。不可那也。韓云那猶何也葉如甘瓜。二

百歲葉落而生花。花形如甘瓜。花復二百歲落盡而生夢。夢下生子。三歲而成熟。成熟之後不

長不減。子形如寒水。長七八寸。徑四五寸。夢復覆生頂。言發夢而得成實此不取萬世如故。若取子而

留夢。夢復生子如初。年月復成熟。復二年則成夢而復生子。其子形如甘瓢。少親練甘羹食之

令人身澤。不可過三升。令人冥醉。半日乃醒。木高人取不能得。唯木下有多羅之人。緣能得之。

多羅一名無葉。世人後生不見葉。故謂之無葉也。一名倚驕。按太平廣記引此作綺縹而張茂

識

東南隅大荒之中。有樸父焉。夫婦並高千里。腹圍自輔。天初立時。使其夫妻導開百川。嬾不用

意。說和作力謫之。並立東南。男露其勢。女露其牝。勢牝謂男女之陰陽。御覽作殺不飲不食。不畏寒暑。唯飲天露。

須黃河清。當復使其夫婦導護百川。古者初立。此人開導河。河或深或淺。或隘或塞。故禹更治。

使其水不壅。天責其夫妻。倚而立之。若黃河清者。則河海絕流。水自清矣。

東南海中有烜洲。洲有溫湖。鮒魚生焉。其長八尺。食之宜暑而辟風寒。

東南有石井。其方百丈。上有二石闕。俠東南面。上有蹲熊。有榜著闕曰地戶。

南荒經

南方有大人。面鳥喙。而有翼。手足扶翼而行。食海中魚。有翼不足以飛。一名鴈兜。書曰。放鴈兜。

于崇山按古文尚書作鵬咬一名驩兜為人很惡不畏風雨禽獸犯死乃休耳

南方有人長二三尺袒身而目在頂上行走如風名曰魍俗曰一名格子善行市

朝衆中遇之者投著廁中乃死旱災消詩曰旱魃為虐或曰生捕得殺之禍去福來

南荒外有火山其中生不盡之木埤按別本作不盡之木晝夜火燃得暴風不猛猛雨不滅埤按今中記南方有炎火山

山四月生火其木皮為火浣布

南方大荒之中有樹焉名曰杻稼樞杻者杻槩也稼者株稼也樞親暱也三千歲作華九千歲

作實其華紫其實赤色其高百丈或千丈也敷張自輔東西南北方枝各近五十丈葉長

七尺廣五尺色如絲青木皮如梓樹理如甘草味飴實長九尺圍如其長而無脈核以竹刀剖

之如凝蜜一作得食復見實即滅矣言復見後實發者壽一萬二千歲埤按言復見以下三字乃茂生註

南方大荒有樹焉名曰如何三百歲作華九百歲作實華色朱其實正黃高五十丈敷張如蓋

葉長一丈廣二尺餘似管苧色青厚五分可以絮如厚朴材理如支九子味如飴實有核形如

棗子或作棘子長五尺圍如長金刀剖之則酸蘆刀剖之則辛食之者地仙不畏水火不畏白刃

南方荒中有涕竹長數百丈圍三丈六尺厚八九寸可以為船其筭甚美食之可以止瘡癰張

先註曰子筭也

南方有肝蟻之林其高百丈圍三尺八寸促節多汁甜如蜜咋嚙其汁令人潤澤可以節蛇蟲

廣記蛇引人腹中蛇蟲其狀如蛇此消穀蟲也多則傷人少則穀不消是甘蔗能滅多益少凡蔗

亦然

不盡木火中有鼠重千斤毛長二尺餘細如絲但居火中洞赤時時出外而毛白以水逐而沃之即死取其毛績紡織以為布用之若有垢泥以火燒之則淨

南方蚊翼下有蜚蟲焉目明者見之每生九卵復未嘗有蠖復成九子蜚而復去蚊遂不知亦食人及百獸食者知言蟲小食人不去也此蟲既細且小因曰細蟻陳章對齊桓公小蟲是也

埤按陳章蟻蟻巢於此蟲常春生以季夏藏于鹿耳中名嬰蛻

南方有獸似鹿而豕首有牙善依人求五穀名無損之獸人割取其肉不病肉復自復其肉惟可作鮓使糯肥美而鮓肉不壞吞之不入糯盡更添肉復作鮓如初愈美名曰不盡鮓是也

獸部引此糯字作鮓鮓字作鮓

南荒之外有火山長四十里廣五十里其中皆生不燼之木火鼠生其中南方有銀山長五十里高百餘丈悉是白銀

西南荒經

西南大荒中有人長一丈腹圍九尺踐龜蛇戴朱鳥左手憑白虎知河海水斗斛識山石多少知天下鳥獸言語土地人民所道知百穀可食識草木鹹苦名曰聖一名哲一名賢

俗曰一先知

名無不達凡人見而拜之令人神智此人為天下聖人也一名先通

西南方有人焉身多毛頭上戴豕貪如狼惡好自積財而不食人穀彊者奪老弱者畏羣而擊

單名曰饕餮。春秋言饕餮者。縉雲氏之不才子也。一名貪惓。一名彊奪。一名凌弱。此國人之皆如此也。西南荒中出詭獸。其狀若菟。人面能言。常欺人言東而西。言惡而善。其肉美食之言不真矣。其肉則其
人言不誠一名誕。

西荒經

崑崙西有獸焉。其狀如犬。長毛四足。似羆而無爪。有目而不見。行不開。有兩耳而不聞。有人知往。有腹無五臟。有腸直而不旋。食物徑過。人有德行而往。牴觸之。有凶德則往。依憑之。天使其然。名為渾沌。春秋云。渾沌帝鴻氏不才子也。空居無為。常咋其尾。回轉仰天而笑。以史記
正義校西方荒中有獸焉。其狀如虎而犬毛。長二尺。人面虎足。猪口牙。尾長一丈八尺。攪亂荒中。名檮杌。一名傲狠。一名難訓。春秋云。顓頊氏有不才子。名檮杌是也。

有人面目手足皆人形。而胫下有翼。不能飛。為人饕餮。淫逸無理。名曰苗民。春秋所謂三苗。書云。竄三苗于三危。

西荒之中有人焉。長短如人。著百結敗衣。手虎爪。名曰獬狁。同人獨行。輒食人腦。或舌出盤地。丈餘。人先聞其聲。燒大石以投其舌。乃氣絕而死。不然食人腦矣。一本云。伺人眠輒
往就人欲食人腦。

西方日宮之外。廣記引
作自官有山焉。其長十餘里。廣二三里。高百餘丈。皆大黃之金。其色殊美。不雜

土石。不生草木。上有金人。高五丈餘。皆純金。名曰金犀。入山下一丈有銀。又一丈有錫。又入一丈有鉛。又入一丈有丹陽銅。似金可鍛。以作錯塗之器。淮南子術曰。餌丹陽之為金是也。淮南
子以

下乃茂生註後人誤合為經梁簡文帝詩云劍鏃丹陽銅用此

西荒中有獸如虎。身長三尺。人面虎足。口牙一丈八尺。人或食之。獸鬪終不退卻。唯死而已。荒中人張捕之。復黠逆知。一名倒壽。

西方深山中有人焉。身長尺餘。袒身捕蝦蟹。性不畏人。見人止宿。暮依其火。以炙蝦蟹。伺人不。在而盜人鹽。以食蝦蟹。名曰山臊。其音自叫。人嘗以竹著火中。爆烘而出。臊皆驚憚。犯之令人寒熱。此雖人形而變化。然亦鬼魅之類。今所在山中皆有之。

西海水上有。人乘白馬。朱鬣。白衣冬冠。從十二童子。馳馬西海水上。如飛如風。名曰河伯使者。或時上岸。馬跡所及。水至其處。所之之國。雨水滂沱。暮則還河。

西海之外。有鵠國焉。男女皆長七寸。為人自然有禮。好經綸。拜跪。其人皆壽三百歲。其行如飛。日行千里。百物不敢犯之。唯畏海鵠。過輒吞之。亦壽三百歲。此人在鵠腹中不死。而鵠一舉千

里。華曰陳章與齊桓公論小兒也

西方山中有蛇。頭尾差大。有色五彩。人物觸之者。中頭則尾至。中尾則頭至。中腰則頭尾並至。名曰率然。茂先註云。會稽常山最多此蛇。孫子兵法。三軍勢如率然者是也。

西北荒經

西北有獸焉。狀似虎。有翼能飛。便勦食人。知人言語。聞人鬪。輒食直者。聞人忠信。輒食其鼻。聞人惡逆不善。輒殺獸往饋之。名曰窮奇。亦食諸禽獸也。埤按別本云窮奇似牛而狸尾尾長雙地其聲似狗狗頭人形鉤爪鋸牙達忠

信之人謁而食之逢姦邪者則禽禽獸而同之

西北荒有人焉。人面朱髮。蛇身人手足。而食五穀禽獸。貪惡愚頑。名曰共工。書流共工於幽州。幽州北裔也。而此言西北方相近也。皆西裔之族耳。

西北荒中有玉饋之酒。酒泉注焉。廣一丈。長深三丈。酒美如肉。澄清如鏡。上有玉尊。玉邊取一尊。一尊復生馬。與天同休無乾時。石邊有脯焉。味如麋鹿脯。飲此酒。人不生死。一名遺酒。其脯

名曰追復。食一片復一片。一作一斤

西北荒中有二金闕。高百丈。金闕銀盤。圖五十丈。二闕相去百丈。上有明月珠。徑三丈。光照千

里。中有金階。西北入兩闕中。名曰天門。增按陸公佐新闕銘云北荒明月即此事

西北荒中有小人。長一分。其君朱衣名冠。乘輅車馬。引為威儀。居人遇其乘車。抓而食之。其味

辛。終年不為物所咋。并識萬物名字。又殺腹中三蟲。三蟲死。便可食。儻藥也。

西北海外有人。長二千里。兩脚中間相去千里。腹圍一千六百里。但日飲天酒五斗。張華云天酒甘露也

不食五穀魚肉。唯飲天酒。忽有饑時。向天仍飲。好遊山海間。不犯百姓。不干萬物。與天地同生。

名曰無路之人。一名仁。一名信。一名神。

北荒經

北方荒中有棗林。其高五十丈。敷張枝條數里餘。疾風不能偃。雷電不能摧。其子長六七寸。圓過其長。熟赤如朱。乾之不縮。氣味潤澤。殊於常棗。食之可以安軀。益於氣力。故方書稱之。赤松

子云。北方大棗味有殊。既可益氣。又安軀。北方荒中有石湖。方千里。岸深五丈餘。恒冰。唯夏至左右五六十日解耳。湖有橫公魚。長七八尺。形如鯉而赤。晝在水中。夜化為人。刺之不入。煮之不死。以烏梅二枚煮之。則死。食之可止邪病。其湖無凸凹平滿。無高下。

北方層冰萬里。厚百丈。有磤鼠在冰下。

磤按御覽引作鼯鼠

土中焉。形如鼠。食草木肉。重千斤。可以作脯。

食之已熱。其毛八尺。可以為褥。卧之卻寒。其皮可以蒙鼓。聞千里。其毛可以來鼠。此毛所在。鼠輒聚焉。

北海有大鳥。其高十尺。頭文曰天。胸文曰候。左翼文曰鷖。右翼文曰勒。頭向東。正海中央。捕魚。或時舉翼而飛。其羽相切如風雷也。

東北荒經

東北荒中有木。高四十丈。葉長五尺。廣三尺。名曰栗。其實徑三尺二寸。其殼赤。其肉黃白。味甜。食之令人短氣而渴。

中荒經

崑崙之山。有銅柱焉。其高入天。所謂天柱也。圓三千里。周圍如削。下有田屋。方百丈。仙人九府治之。上有大鳥。名曰希有。南向。張左翼覆東王公。右翼覆西王母。背上小處無羽。一萬九千里。西王母歲登翼上。會東王公也。故其柱銘曰。崑崙銅柱。其高入天。員周如削。膚體美焉。其鳥銘曰。有鳥希有。辟赤煌煌。不鳴不食。東覆東王公。西覆西王母。王母欲東登之。自通陰陽相須。唯

會益工

九府玉童玉女與天地同休息。男女無為匹配。而仙道自成。張茂先曰。言不為夫妻也。男女名曰玉人。

東方有宮。青石為牆。高三仞。左右闕高百尺。畫以五色。門有銀榜。以青石碧鏤。題曰天地長男之宮。西方有宮。白石為牆。五色各黃。門有金榜而銀鏤。題曰天地少女之宮。中央有宮。以金為牆。門有金榜以銀鏤。題曰天皇之宮。南方有宮。以赤石為牆。赤銅為門。闕有銀榜。曰天皇中女之宮。北方有宮。以黑石為牆。題曰天地中男之宮。東南有宮。黃石為牆。黃榜碧鏤。題曰天地少男之宮。西方有宮。黃銅為牆。題曰地皇之宮。

東方裔外有東明山。以青石為牆。西方裔外有大夏山。以金為牆。南方裔外有岡明山。以赤石為牆。西南裔外老壽山。以黃銅為牆。東南裔外闡清山。以青石為牆。西北裔外西明山。以白石為牆。皆有宮。蓋神仙之宅也。東北有鬼星石室。三百戶共一門。石榜題曰鬼門。西南銅闕夾榜。題曰人往門。東北銅闕夾門。榜題曰人來門。

南方有獸焉。角足大小形狀如水牛。皮毛黑如漆。食鐵飲水。其糞可為兵器。其利如剛。名曰鑿鐵。各黃經云南方鑿鐵糞利為剛。食鐵飲水。腸中不傷。按今蜀中深山亦有鑿鐵獸。

鬼門晝日不開。至暮即有人語。有青火色。

西南大荒有馬。其大二丈。髯至膝。尾委地。蹄如丹。蹠可握。日行千里。至日中而汗血。乘者當以

絮纏頭以辟風病彼國人不纏。

北方有獸焉其狀如獅子食人則病名曰狻_{音恒}近人村里入人居室百姓患苦天帝徙之北方荒中。

西方深山有獸焉面目手足毛色如猴體大如驢善緣高木皆雌無雄名綱順人三合而有子要路彊牽男人將上絕冢之上取菓并竊五穀食更合三畢而定十月乃生。

不孝鳥狀如人身犬毛有齒猪牙額上有文曰不孝口下有文曰不慈背上有文曰不道左脅有文曰愛夫右脅有文曰憐婦故天立此異畀以顯忠孝也。

Blank manuscript page with vertical lines.

海內十洲記

漢 東方朔撰

祖洲在東海

瀛洲在東海

冬洲在北海

炎洲在南海

長洲在南海

元洲在北海

流洲在南海

生洲在東海

鳳麟洲在南海

聚窟洲在南海

漢武帝既聞王母說八方巨海之中有祖洲瀛洲冬洲炎洲長洲元洲流洲生洲鳳麟洲聚窟洲有此十洲乃人跡所稀絕處又始知東方朔非世常人是以前延之曲室而親問十洲所在所有之物名故書記之方朔云臣學仙者耳非得道之人以國家之盛美將招名儒墨於文教之內抑絕俗之道於虛詭之迹臣故謫隱逸而赴王庭藏養生而侍朱闕亦由尊上好道且復欲抑絕其威儀也曾隨師主履行比至朱陵扶桑蜃海冥夜之丘純陽之陵始青之下月宮之間內遊七丘中旋十洲踐赤縣而遨五岳行陂澤而息名山臣自少及今周流六天廣涉天光極於是矣未若淩虛之子飛真之官上下九天洞視百萬北極句陳而并華蓋南翔太丹而棲大夏東之通陽之霞西薄寒穴之野日月所不逮星漢所不與其上無復物其下無復底臣所識乃及於是愧不足以酬廣訪矣

百子金書
祖洲近在東海之中。地方五百里。去西岸七萬里。上有不死之草。草形如菰。苗長三四尺。人已死三日者。以草覆之。皆當時活也。服之令人長生。昔秦始皇大苑中。多枉死者。橫道有鳥如烏。狀啣此草。覆死人面。當時起坐而自活也。有司聞奏。始皇遣使者齎草。以問北郭鬼谷先生。鬼谷先生云。此草是東海祖洲上。有不死之草。生瓊田中。或名為養神芝。其葉似菰。苗叢生。一株可活一人。始皇於是慨然言曰。可採得否。乃使使者徐福。發童男童女五百人。率攝樓船等。入海尋祖洲。遂不返。福道士也。字君房。後亦得道也。

瀛洲在東海中。地方四千里。大抵是對會稽。去西岸七十萬里。上生神芝仙草。又有玉石。高且千丈。出泉如酒。味甘。名之為玉醴泉。飲之數升。輒醉。令人長生。洲上多仙家。風俗似吳人。山川如中國也。

牟洲在北海之中。戌亥之地方七十二百里。去南岸三十六萬里。上有太牟都。仙伯真公所治。多丘山。又有風山。聲響如雷。電對天西北門上。多太牟仙官宮室。宮室各異。饒金芝玉草。乃是三天君下治之處。其肅肅也。

炎洲在南海中。地方二千里。去北岸九萬里。上有風生獸。似豹。青色。大如狸。張網取之。積新數車。以燒之。薪盡而獸不然。灰中而立。毛亦不焦。斫刺不入。打之如灰囊。以鉄鎚鍛其頭數十下。乃死。而張口向風。須臾復活。以石上菖蒲塞其鼻。即死。取其腦和菊花服之。盡十斤。得壽五百年。又有火林山。山中有火光獸。大如鼠。毛長三四寸。或赤或白。山可三百里許。晦夜即見此山。

林乃是此獸光照狀如火光相似取其獸毛以緝為布時人號為火浣布此是也國人衣服垢污以灰汁浣之終無潔淨唯火燒此衣服兩盤飯間振擺其垢自落潔白如雪亦多仙家

長洲一名青丘在南海辰巳之地地方各五千里去岸二十五萬里上饒山川及多大樹樹乃有二千圍者一洲之上專是林木故一名青丘又有仙草靈藥甘液玉英靡所不有又有風山山恒震聲有紫府宮天真仙女遊於此地

元洲在北海中地方三千里去南岸十萬里上有五芝冬澗澗水如蜜漿飲之長生與天地相畢服此五芝亦得長生不死亦多仙家

流洲在西海中地方三千里去東岸十九萬里上多山川積石名為昆吾冶其石成鐵作劍光明洞照如水精狀割玉物如割泥亦饒仙家

生洲在東海丑寅之間接蓬萊十七萬里地方二千五百里去西岸二十三萬里上有仙家數萬天氣安和芝草常生地無寒暑安養萬物亦多山川仙草眾芝一洲之水味如飴酪至良洲者也

鳳麟洲在西海之中央地方一千五百里洲四面有弱水繞之鴻毛不浮不可越也洲上多鳳麟數萬各為羣又有山川池澤及神藥百種亦多仙家煮鳳喙及鱗角合煎作膏名之為續弦膠或名連金泥此膠能續弓弩已斷之弦刀劍斷折之金更以膠連續之使力士掣之他處乃斷所續之際終無斷也武帝天漢三年帝幸北海祠恆山四月西國王使至獻此膠四兩吉光

毛裘武帝受以付外庫不知膠裘二物之妙用也。以為西國雖遠而上貢者不奇。稽留使者未還。又時武帝幸華林園射虎而弩絃斷。使者時從駕。又上膠一分。使口濡以續弩絃。帝驚曰。異物也。乃使武士數人共對掣引之。終日不脫。如未續時也。膠色青如碧玉。吉光毛裘黃色。蓋神馬之類也。裘入水數日不沉。入火不焦。帝於是乃悟。厚謝使者而遣去。賜以牡桂乾姜等諸物。是西方國之所無者。又益思東方朔之遠見。周穆王時。西胡獻昆吾割玉刀。及夜光常滿杯。刀長一尺。杯受三升。刀切玉如切泥。杯是白玉之精。光明夜照。冥夕出杯於中庭。以向天。比明而水汁已滿於杯中。也。汁甘而香美。斯實靈人之器。秦始皇時。西胡獻切玉刀。無復常滿杯耳。如此膠之所出。從鳳麟洲來。劍之所出。必從流洲來。並是西海中所有也。

聚窟洲在西海中申未之地。地方三千里。北接崑崙二十六萬里。去東岸二十四萬里。上多真仙靈官宮第。比門不可勝數。及有獅子辟邪。鑿齒天鹿。長牙銅頭鐵額之獸。洲上有大山。形似人鳥之象。因名之為人鳥山。山多大樹。與楓木相類。而花葉香聞數百里。名為反魂樹。扣其樹亦能自作聲。聲如羣牛吼。聞之者皆心震神駭。伐其木根心於玉釜中煮取汁。更微火煎如黑錫狀。令可丸之。名曰驚精香。或名之為震靈丸。或名之為反生香。或名之為震檀香。或名之為人鳥精。或名之為卻死香。一種六名。斯靈物也。香氣聞數百里。死者在地聞香氣乃卻活。不復亡也。以香薰死人。更加神驗。征和三年。武帝幸安定。西胡月支國王遣使獻香四兩。大如雀卵。黑如桑椹。帝以香非中國所有。以付外庫。又獻猛獸一頭。形如五六十日犬子。大似狸而色黃。

命國使將入呈帝見之。使者抱之似大羸細禿悴。尤怪其言非也。問使者。此小物可弄何謂猛獸。使者對曰。夫威加百禽者不必繫之以大小。是以神麟故為巨象之王。鸞鳳必為大鵬之宗。百足之蟲制於螭蛇。亦不在於巨細也。臣國去此三十萬里。國有常占。東風入律。百旬不休。青雲干呂。連月不散者。當知中國時有好道之君。我王國將賤百家而貴道儒。薄金玉而厚靈物也。故搜竒蘊而貢神香。步天林而請猛獸。乘羣車而濟弱淵。策驥足以度飛沙。契關途遙辛苦。蹊路於今已十三年矣。神香起天殲之死。疾猛獸卻百邪之魑鬼。夫此二物實濟衆生之至要。助政化之昇平。豈圖陛下反不知真乎。是臣國占風之謬矣。今日仰鑒天姿。亦乃非有道之君也。眼多視則貪色。口多言則犯難。身多動則淫賊。心多飾則奢侈。未有用此四者而成天下之治也。武帝而然不平。又問使者。猛獸何方而伏。百禽食噉何物。奮力何比。其所生何鄉耶。使者曰。猛獸所出。或生崑崙。或生不圖。或生聚窟。或生天路。其壽不窮。食氣飲露。解人言語。仁慧忠恕。當其仁也。愛護蠢動。不犯虎豹。當其威也。一聲叫發。千人伏息。牛馬百物驚斷。緝繫。武士奄忽。失其勢力。當其神也。立興風雲。吐嗽雨露。百邪遁走。蛟龍騰驚。處於太上之廐。役御獅子。名曰猛獸。蓋神光無常。能為大禽之宗主。乃攬天之元王。辟邪之長帥者也。靈香雖少。斯更生之神丸也。疫病災死者。將能起之。及聞氣者即活也。芳又特甚。故難歇也。於是帝使使者令猛獸發聲。試聽之。使者乃指獸命喚一聲。獸舐脣良久忽叫。如天大雷霹靂。又兩目如礪礪之交光。光朗衝天。良久乃止。帝登時顛蹶掩耳震動不能自止。侍者及武士虎賁皆失仗伏地。諸內外

牛馬豕犬之屬皆絕絆離繫驚駭放蕩久許咸定帝忌之因以此獸付上林苑令虎食之於是虎聞獸來乃相聚屈積如死虎伏獸入苑徑上虎頭觸虎口去十步已來顧視虎虎輒閉目帝恨使者言不遜欲收之明日失使者及猛獸所在遣四出尋討不知所止到後元元年長安城內病者數百亡者大半帝試取月支神香燒之於城內其死未三月者皆活芳氣經三月不歇於是信知其神物也乃更祕錄餘香後一旦又失之檢函封印如故無復香也帝愈懊恨恨不禮待於使者益貴方朔之遺語自愧求李君之不勤慙衛叔卿於指庭矣明年帝崩於五柞宮已亡月支國人烏山震檀卻死等香也向使厚待使者帝崩之時何緣不得靈香之用耶自合命殞矣

滄海島在北海中地方三千里去岸二十一萬里海四面繞島各廣五千里水皆蒼色仙人謂之滄海也島上俱是大山積石至多石象八石石腦石桂英流丹黃子石膽之輩自餘種皆生於島石服之神仙長生島中有紫石宮室九老仙都所治仙官數萬人居焉

方丈洲在東海中心西南東北岸正等方丈方面各五千里上專是羣龍所聚有金玉琉璃之宮三天司命所治之處羣仙不欲昇天者皆往來此洲受大孖生錄仙家數十萬耕田種芝草課計頃畝如種稻狀亦有玉石泉上有九源丈人宮主領天下水神及龍蛇巨鯨陰精水獸之輩

扶桑在東海之東岸直陸行登岸一萬里東復有碧海海廣狹浩汗與東海等水既不鹹苦

正作碧色甘香味美扶桑在碧海之中地方萬里有太帝宮太真東王父所治處地多林木葉皆如桑又有椹樹長者數千丈大二千餘圍樹兩兩同根偶生更相依倚是以名為扶桑仙人食其椹而一體皆作金光色飛翔空立其樹雖大其葉椹故如中夏之桑也但椹稀而色赤九千歲一生實耳味絕甘香美地生紫金丸玉如中夏之瓦石狀真仙靈官變化萬端蓋無常形亦有能分形為百身十丈者也

蓬丘蓬萊山是也對東海之東北岸周迴五千里外別有圓海繞山圓海水正黑而謂之冥海也無風而洪波百丈不可得往來上有九老丈人九天真玉宮蓋太上真人所居唯飛仙有能到其處耳

崑崙號曰崑崙在西海之戌地北海之亥地去岸十三萬里又有弱水周迴繞市山東南接積石圃西北接北戶之室東北臨大活之井西南至承淵之谷此四角大山實崑崙之支輔也積石圃南頭是王母居周穆王云咸陽去此四十六萬里山高平地三萬六千里上有三角方廣萬里形似偃盆下狹上廣故名曰崑崙山三角其一角正北干辰之輝名曰閭風巔其一角正西名曰冬圃堂其一角正東名曰崑崙宮其一角有積金為天墉城面方千里城上安金臺五所玉樓十二所其北戶山承淵山又有墉城金臺玉樓相鮮如流精之闕光碧玉之堂瓊華之室紫翠丹房錦雲燭日朱霞九光西王母之所治也真官仙靈之所宗上通璿璣元氣流布五常玉衡理九天而調陰陽品物羣生希奇特出皆在於此天人濟濟不可具記此乃天地之根

組萬度之綱柄矣。是以太上名山鼎於五方。鎮地理也。號天柱於珉城。象綱輔也。諸百川極深水靈居之。其陰難到。故治無常處。非如丘陵而可得論爾。乃天地設位。物象之宜。上聖觀方。緣形而著爾。乃處多風於西極。坐王母於坤鄉。昆吾鎮於流澤。扶桑植於碧津。離合火生而光獸生於炎野。坎總衆陰。是以仙都宅於海島。艮位名山。蓬山鎮於寅丑。巽體元女。養巨木於長洲。高風鼓於羣龍之位。暢靈符於瓊丘。至妙多深。幽神難盡。真人隱宅。靈陵所在。六合之內。豈唯數處而已哉。此蓋舉其標末爾。臣朔所見不博。未能宣通王母及上元夫人聖旨。昔曾聞之於得道者。說此十洲大丘靈島。皆是真仙隕墟。神官所治。其餘山川萬端。並無覲者矣。其北海外又有鐘山。在北海之子地。隔弱水之北。一萬九千里。高一萬三千里。上方七千里。周旋三萬里。自生玉芝及神草四十餘種。上有金臺玉闕。亦元氣之所舍。天帝居治處也。鐘山之南有平邪山。北有蛟龍山。西有勁草山。東有東木山。四山並鐘山之枝幹也。四山高鐘山三萬里。官城五所如一。登四面山下望。乃見鐘山爾。四面山乃天帝君之城域也。仙真之人。出入道經自一路。從平邪山東南入穴中。乃到鐘山北阿門外也。天帝君總九天之維。貴無比焉。山源周迴。具有四城之高。但當心有觀於崑崙也。昔禹治洪水既畢。乃乘蹻車度弱水而到此山。祠上帝於北阿。歸大功於九天。又禹經諸五嶽。使工刻石識其里數高下。其字科斗書。非漢人所書。今丈尺里數皆禹時書也。不但刻削五岳。諸名山亦然。刻山之獨高處爾。今書是臣朔所具見。其王母所道諸靈數。禹所不履。唯書中夏之名山爾。臣先師谷希子者。太上真官也。昔授臣崑崙鐘山。

蓬萊山及神洲真形圖。昔來入漢。留以寄知故人。此書又尤重於嶽形圖矣。昔也傳授年限正同爾。陛下好道思微。甄心內向。天尊下降。並傳授寶秘。臣朔區區亦何嫌惜。而不止所有哉。然術家幽其事。道法祕其師。術泄則事多疑。師顯則妙理散。願且勿宣臣之意也。

武帝欣聞至說。明年遂復從受諸真形圖。常帶之助後。八節當朝拜靈書。以書求度脫焉。朔謂滑稽逆知。預觀帝心。故弄萬乘傲公侯。不可得而師友。不可得而喜怒。故武帝不能盡至理於此人。

洞冥記序

憲家世述道書推求先聖往賢之所撰集不可窮盡千室不能藏萬乘不能載猶有漏逸或言浮誕非政教所同經文史官記事故略而不取蓋偏國殊方並不在錄愚謂古曩餘事不可得而棄況漢武帝明俊特異之主東方朔因滑稽浮誕以匡諫洞心於道教使冥迹之奧昭然顯著今籍舊史之所不載者聊以聞見撰洞冥記四卷成一家之書庶明博君子該而異焉武帝以欲窮神仙之事故絕域遐方貢其珍異奇物及道術之人故於漢世盛於羣主也故編次之云爾東漢郭憲序

洞冥記總目

卷一

十一則

卷二

二十一則

卷三

二十二則

卷四

六則

別國洞冥記卷一

漢 郭憲撰

漢武帝未誕之時。景帝夢一赤氣從雲中直下。入崇蘭閣。帝覺而坐于閣上。果見赤氣如烟霧來蔽戶牖。望上有丹霞翬翬而起。乃改崇蘭閣為猗蘭殿。後王夫人誕武帝于此殿。有青雀羣飛于霸城門。乃改為青雀門。乃更修飾。刻木為綺橈。雀去。因名青綺門。

東方朔字曼倩。父張夷。字少平。妻田氏女。夷年二百歲。顏如童子。朔生三日而田氏死。時景帝三年也。鄰母拾而養之。三歲。天下秘識一覽。閱誦于口。居常指為天下。空中獨語。鄰母忽失朔。累月方歸。母咎之。後復去。經年乃歸。母忽見。大驚曰。汝行經年一歸。何以慰我耶。朔曰。兒至紫泥海。有紫水污衣。仍過虞淵。湔浣。朝發中返。何云經年乎。母問之。汝悉是何處行。朔曰。兒溺衣竟。暫息都崇堂。王公飴之以丹霞漿。兒食之太飽。悶幾死。乃飲玄天黃露半合。即醒。既而還路。遇一蒼虎。息于路傍。兒騎虎。還打捶過痛。虎噬兒脚傷。母悲嗟。乃裂青布裳裹之。朔復去。家萬里。見一枯樹。脫布挂於樹。布化為龍。因名其地為布龍澤。朔以元封中遊濛鴻之澤。忽見王母采桑於白海之濱。俄有黃翁指阿母以告朔曰。昔為吾妻。託形為太白之精。今汝此星精也。吾卻食吞氣已九千餘歲。目中瞳子。色皆青。光能見幽隱之物。三千歲一反骨洗髓。二千歲一刻骨伐毛。自吾生已三洗髓五伐毛矣。

建元二年。帝起騰光臺。以望四遠。於臺上撞碧玉之鐘。掛懸黎之磬。吹霜條之簫。唱來雲依日。

之曲。方朔再拜於帝前曰。臣東遊萬林之野。獲九色鳳雛。涿源丹瀨之水。赤色。西過洞壑。得滄淵虬子。靜海遊珠洞壑。在虞淵西。虬泉池在五柞宮北。中有追雲舟。起風舟。侍仙舟。含烟舟。或以沙棠為柁櫂。或以木蘭文柘為櫓棹。又起五層臺於月下。

釣影山去昭河三萬里。有雲氣望之如山影。丹藿生於影中。葉浮水上。有紫河萬里深十丈。中有寒荷。霜下方香。盛有降靈壇。養靈池。分光殿五間。奔雷室七間。望蟾閣十二丈。上有金鏡廣四尺。元封中有祇國獻此鏡。照見魑魅。不獲隱形。

都夷香如棗核。食一片則歷月不饑。以粒如粟米許投水中。俄而滿大孟也。

甘泉宮南。昆明池中有靈波殿七間。皆以桂為柱。風來自香。帝既耽於靈怪。常得丹豹之髓。白鳳之膏。磨青錫為屑。以蘇油和之。照於神壇。夜暴雨光不滅。有雙蛾如蜂赴火。侍者舉麟鬚拂拂之。

元光中。帝起壽靈壇。壇上列植垂龍之木。似青梧高十丈。有朱露色如丹。汁灑其葉。地皆成珠。其枝似龍之倒垂。亦曰珍枝樹。此壇高八尺。帝使董謁乘雲霞之輦。以昇壇。至夜三更。聞野雞鳴。忽如曙。西王母駕玄鸞。歌春歸樂。謁乃聞王母歌聲而不見其形。歌聲遶梁三匝乃止。壇傍草樹枝葉。或翻或動。歌之感也。四面列種軟棗。條如青桂。風至自拂。堦上遊塵。

董謁字仲玄。武都郿邑人也。少好學。嘗遊山澤。負挾圖書。患其繁重。家貧拾樹葉以代書簡。言其易卷懷也。編荊為牀。聚鳥獸毛以寢其上。

波祗國亦名波弋國獻神精香草亦名荃靡一名春蕪一根百條其間如竹節柔軟其皮如絲可為布所謂春蕪布亦名香荃布堅密如紬冰也握一片滿室皆香婦人帶之彌月芬馥翁韓國獻飛骸獸狀如鹿青色以寒青之絲為繩繫之及死帝惜之而不瘞掛於苑門皮毛皆爛朽惟骨色猶青時人咸知其神異更以繩繫其足往視之唯見所繫處存而頭尾及骨皆飛去

且露池西有靈池方四百步有連錢荇浮根菱倒枝藻連錢荇荇如錢文浮根菱根出水上葉沉波下實細薄皮甘香葉半青半黃霜降彌美因名青水菱也倒枝藻者枝橫倒水中長九尺餘如結網有野鴨秋鳧及鷗鷺來翔水上入此草中皆不得出如繒網也亦名水網藻中有轉羽觥凌龍觥凌波觥帝嘗遊宴於此

別國洞冥記卷二

漢 郭憲撰

元鼎元年。起招仙閣於甘泉宮西。編翠羽鱗毫為簾。青瑠璃為扇。懸黎火齊為床。其上懸浮金輕玉之磬。浮金者色如金。自浮於水上。輕玉者其質貞明而輕。有霞光繡。有藻龍繡。有連烟繡。有走龍錦。有雲鳳錦。翻鴻錦。閣上燒荃靡香屑。燒粟許。其氣三月不絕。進崑崙細棗。出崑崙山。山臨碧海上。萬年一實。如今之軟棗。昨之有膏。膏可燃燈。西王母握以獻帝。燃芳似燈光。色紫。有白鳳黑龍。鼻足來戲於閣邊。有青鳥赤頭。道路而下以迎神女。神女留玉釵以贈帝。帝以賜趙婕妤。至昭帝元鳳中。宮人猶見此釵。黃琳欲之。明日示之。既發匣。有白燕飛昇天。後宮人學作此釵。因名玉燕釵。言吉祥也。

元鼎五年。鄧支國貢馬肝石百斤。常以水銀養之。內玉櫃中。金泥封其上。國人長四尺。惟餌此石而已。半青半白。如今之馬肝。泰碑以和九轉之丹服之。彌年不饑渴也。以之拂髮。白者皆黑。帝坐羣臣於甘泉殿。有髮白者。以石拂之。應手皆黑。是時公卿語曰。不用作方伯。惟須馬肝石。此石酷烈。不和丹砂。不可近髮。

帝寢靈壯殿。召東方朔於青綺窗。不隔綈紉重幕。問朔曰。漢承庚運。火德。以何精瑞為祥。應朔跪而對曰。臣常過吳明之墟。是長安東。過扶桑七萬里。有及雲山。山頂有井。雲起井中。若土德。玉黃雲出。火德。王赤雲出。水德。玉黑雲出。金德。王白雲出。木德。王青雲出。此皆應瑞德也。帝曰。善。

元封中起方山像招諸靈異召東方朔言其秘奧乃燒天下異香有沉光香精祇香明庭香金磬香塗魂香外國所貢精櫃之燈青櫃木有膏如淳漆削置器中以蠟和之塗布燃照數里起神明臺上有九天道金牀象席琥珀鎮雜玉為簾帝坐良久設甜水之冰以備沐濯酌瑤琨碧酒炮青豹之脯果則有塗陰紫梨琳國碧李仙衆與食之

吠勒國貢文犀四頭狀如水兕角表有光因名明犀置暗中有光影亦曰影犀織以為簾如錦綺之文此國去長安九千里在日南人長七尺被髮至踵乘犀象之車乘象入海底取寶宿於鮫人之舍得淚珠則鮫所泣之珠也亦曰泣珠甜水去虞淵八里有甜溪水味如蜜東方朔遊此水得數斛以獻帝投水於井井常甜而寒洗沐則肌理柔滑

瑤琨去玉門九萬里有碧草如麥割之以釀酒則味如醇酎飲一合三旬不醒但飲甜水隨飲而醒

塗山之背梨大如升或云斗紫色千年一花亦曰紫輕梨

琳國去長安九千里生玉葉李色如碧玉數十年一熟味酸昔韓終常餌此李因名韓終李

元封三年大秦國貢花蹄牛其色駸高六尺尾環繞其身角端有肉蹄如蓮花善走多力帝使輦銅石以起望仙宮跡在石上皆如花形故陽關之外花牛津時得異石長十丈高三丈立於望仙宮因名龍鍾石武帝末此石自陷入地唯尾出土上今人謂龍尾墩也

帝好微行於長安城西夜見一螭遊於路董謁曰昔桀媚末喜於膝上以金簪貫玉螭腹為戲

今螭腹餘金簪穿痕得此非耶曰白龍魚鱗網者食之帝曰試我也

元封四年修彌國獻駿騾高十尺毛色赤斑皆有日月之象帝以金埏為鐙絆以寶器盛芻以飼之

元封五年勒畢國貢細鳥以方尺之玉籠盛數百頭形如大蠅狀似鸚鵡聲聞數里之間如黃鵠之音也國人常以此鳥候時亦名曰候日蟲帝置之於宮內旬日而飛盡帝惜求之不復得明年見細鳥集帷幕或人衣袖因名蟬宮內嬪妃皆悅之有鳥集其衣者輒蒙愛幸至武帝末稍稍自死人猶愛其皮服其皮者多為丈夫所媚

勒畢國人長三寸有翼善言語獻笑因名善語國常羣飛往日下自曝身熱乃歸飲丹露為漿丹露者日初出有露汁如珠也

太初二年東方朔從西那汗國歸得聲風木十枝獻帝長九尺大如指此木臨因桓之水則禹貢所謂因桓是也其源出甜波樹上有紫燕黃鵠集其間實如汕麻風吹枝如玉聲因以為名帝以枝遍賜羣臣臣有凶者枝則汗臣有死者枝則折昔老聃在於周世年七百歲枝竟未汗偃佺生於堯時年三千歲枝竟未一折帝乃以枝問朔朔曰臣已見此枝三過而枯而復生豈汗折而已哉里語曰年未半枝不汗此木五千年一汗萬歲不枯

太初三年起甘泉望風臺臺上得白珠如花一枝帝以錦蓋覆之如照月矣因名照月珠以賜董偃盛以琉璃之筐

太初四年東方朔從支提國來國人長三丈二尺三手三足各三指多力善走國內小山能移之有澗泉飲能盡結海苔為衣其戲笑取辱象相投擲為樂

東方朔遊吉雲之地得神馬一疋高九尺帝問朔是何獸也朔曰昔西王母乘靈光輦以適東王公之舍稅此馬遊於芝田乃食芝田之草東王公怒棄馬于清津天岸臣至王公之壇因騎馬返繞日三匝然入漢關關猶未掩臣於馬上睡不覺而至帝曰其名云何對曰因疾為名步景朔當乘之時如駕蹇之驢耳東方朔曰臣有吉雲草十種種於九景山東二千歲一花明年應生臣走請刈之得以秣馬馬終不飢也朔曰臣至東極過吉雲之澤多生此草移於九景之山全不如吉雲之地帝曰何謂吉雲朔曰其國俗之雲氣占吉山若樂事則滿室雲起五色照人著於草樹皆成五色露珠甚甘帝曰吉雲露可得乎東方朔走至夕而返得玄露青露盛青琉璃各受五合跪以獻帝遍賜羣臣羣臣得嘗者老者皆少疾者皆愈凡五官嘗露董謁李克孟歧郭瓊黃安也

李克馮翊人也自言三百歲荷蓐菴負五岳真圖而至帝禮待之亦號負圖先生也

孟歧河清之逸人也年可七百歲語及周初事了然如目前歧侍周公昇壇上歧以手摩成王足周公以玉笏與之歧嘗寶執每以衣袂拂拭笏厚七分令銳斷恒切桂葉食之聞帝好仙披草蓋而來謁帝馬

郭瓊東郡人也形貌醜劣而意度過人曾宿人家輒乞新自照讀書晝眠不閉行地無迹帝

聞其異徵焉。

黃安代郡人也。為代郡卒。自云卑猥。不獲處人間。執鞭懷荆而讀書。畫地以記數。日久地成池矣。時人謂黃安年可八十餘。視如童子。常服朱砂。舉體皆赤。冬不着裘。坐一神龜。廣二尺。人問子坐此龜幾年矣。對曰。昔伏羲始造網罟。獲此龜。以授吾。吾坐龜背已平矣。此龜畏日月之光。二千歲即一出頭。吾坐此龜。已見五出頭矣。行即負龜以趨。世人謂黃安萬歲矣。

Blank page with vertical lines.

別國洞冥記卷三

漢 郭憲撰

天漢二年帝昇蒼龍閣思仙術召諸方士言遠國遐方之事唯東方朔下席操筆跪而進帝曰大夫為朕言乎朔曰臣遊北極至種火之山日月所不照有青龍銜燭火以照山之四極亦有園圃池苑皆植異木異草有明莖草夜如金燈折枝為炬照見鬼物之形仙人寧封常服此草於夜暝時轉見腹光通外亦名洞冥草帝令剉此草為泥以塗雲明之館夜坐此館不加燈燭亦名照魅草以藉足履水不沉

有夢草似蒲色紅晝縮入地夜則出亦名懷夢懷其葉則知夢之吉凶立驗也帝思李夫人之容不可得朔乃獻一枝帝懷之夜果夢夫人因改曰懷夢草

有鳳葵草色丹葉長四寸味甘久食令人身輕肌滑赤松子餌之三歲乘黃蛇入水得黃珠一枚色如真金或言是黃蛇之卵故名蛇珠亦名銷疾珠語曰寧失千里駒不失黃蛇珠

有五味草初生味甘花時味酸食之使人不眠名曰卻睡草末多國獻此草此國人長四寸織鱗毛為布以文石為牀人形雖小而室宇崇曠織鳳毛錦以錦為帷幕也

鳥哀國有龍爪薤長九尺色如玉煎之有膏以和紫桂為丸服一粒十歲不飢故語曰薤和膏身生毛

有掌中芥葉如松子取其子置掌中吹之而生一吹長一尺至三尺而止然後可移於地上若

不經掌中吹者。則不生也。食之能空中孤立。足不躡地。亦名躡空草。

帝常見彗星。東方朔折指星之木。以授帝。帝以木指彗星。星尋則沒也。星出之夜。野獸皆鳴。別說謂之獸鳴星。

有紫柰。大如斗。甜如蜜。核紫花青。研之。有汁如漆。可染衣。其汁着衣。不可渝浣。亦名闇衣柰。有龍肝。長一尺。花紅葉素。生於冰谷。所謂冰谷素葉之瓜。仙人瑕丘仲採藥。得此瓜。食之。十歲不渴。瓜上恆如霜雪。刮嘗如蜜。淳及帝封泰山。從者皆賜冰谷素葉之瓜。帝解鳴鴻之刀。以賜朔。刀長三尺。朔曰。此刀黃帝采首山之銅鑄之。雄已飛去。雌者猶存。帝臨崩。舉刀以示朔。恐人得此刀。欲銷之。刀於手中化為鵲。赤色。飛去雲中。

有鵲銜火於清溪之上。鵲化成龍。

西域獻火龍。高七尺。映日看之。光如聚炬火。有童子遙見。有黃鵠白首。鼓翅於帝前。即方朔着黃綾單衣。頭已斑白。漢朝皆異其神化。而不測其年矣。

善死國嘗貢一蟹。長九尺。有百足四螯。因名百足蟹。煮其殼。勝於黃膠。亦謂之螯膠。勝於鳳喙之膠也。

帝嘗夕望東邊。有青雲起。俄而見雙白鵲集臺之上。倏忽變為二神女。舞於臺。握鳳管之簫。撫落霞之琴。歌青吳春波之曲。帝舒闥海玄落之席。散明天發日之香。香出胥池寒國。地有發日樹。言日從雲出。雲來掩日。風吹樹枝。拂雲開日光也。亦名開日樹。樹有汁滴如松脂也。

有玄都翠水水中有菱碧色狀如雞飛亦名翔雞菱仙人鳧伯子常遊翠水之源采菱而食之令骨輕舉身生毛羽也

有遠飛雞夕則還依人曉則絕飛四海朝往夕還常銜桂枝之實歸於南山或落地而生高七八尺衆仙奇愛之劉以釀酒名曰桂醪嘗一滴舉體如金色陸通嘗餌黃桂之酒祝雞公善養雞得遠飛雞之卵伏之名曰翻明雞如鵠大色紫有翼翼下有目亦曰目羽雞

帝於望鵠臺西起俯月臺臺下穿池廣千尺登臺以眺月影入池中使仙人乘舟弄月影因名影娥池亦曰眺蟾臺酌雲璚酒璚以玄草黑蕨金蒲甜蓼果以青櫻龍爪白芋紫萁寒蕨地花氣葛此葛於地下生花入地十丈乃得此葛其根倒出亦名金虎鬚草因名紫鬚葛也

影娥池中有遊月船觸月船鴻毛船遠見船載數百人或以青林之枝為櫂或以木蘭之心為檣練實之竹為篙紉石脉之為繩纜也石脉出晡東國細如絲可縷萬斤生石裏破石而後得此脉縈緒如麻紵也名曰石脉亦可為布也

影娥池中有鼈龜望其羣出岸上如連壁弄於沙岸也故語曰夜未央待龜黃影娥池北作鳴禽之死有生金樹破之皮間有屑如金而色青亦名青金樹

有司夜雞隨鼓節而鳴不息從夜至曉一更為一聲五更為五聲亦曰五時雞有喜日鵝至日出時銜翅而舞又名曰舞日鵝

有升菰鴨赤色每止於芙蕖上不食五穀唯啞葉上垂露因名垂露鴨一名丹毛鳧

有女香樹細枝葉婦人帶之香終年不減

別國洞冥記卷四

漢 郭憲撰

武帝末年。彌好仙術。與東方朔狎。帝曰。朕所好甚者不老。其可得乎。朔曰。臣能使少者不老。帝曰。服何藥耶。朔曰。東北有地。日之草。西南有春生之草。帝曰。何以知之。朔曰。三足鳥數下地。食此草。羲和欲馭。以手拚鳥目。不聽下也。食草能不老。他鳥獸食此草。則美悶不能動矣。帝曰。子何以知乎。朔曰。臣小時掘井。陷落地下。數十年無所記。寄有人引臣欲往此草。中隔紅泉。不得渡。其人以一隻屐與臣。臣泛紅泉。得至此草之處。臣采而食之。其國人皆織珠玉為葦。邀臣入雲端之幕。設玄珉雕枕。刻黑玉銅鏤為日月雲霄之狀。亦曰縷雲枕。又薦蛟毫之白褥。以蛟毫織為褥也。此毫柔而冷。常以夏日舒之。因名柔毫褥。又有水藻之屏。臣舉手拭之。恐水流溼其席。乃其光也。

帝所幸宮人。名麗娟。年十四。玉膚柔軟。吹氣勝蘭。不欲衣纓拂之。恐體痕也。每歌李延年和之於芝生殿。唱迴風之曲。庭中花皆翻落。置麗娟於明離之帳。恐塵垢汚其體也。帝常以衣帶縛麗娟之袂。閉於重幕之中。恐隨風而去也。麗娟以琥珀為佩。置衣裙裏。不使人知。乃言骨節自鳴。相與為神怪也。

有丹蝦長十丈。鬚長八尺。有兩翅。其鼻如鋸。戴紫桂之林。以鬚纏身。急流以為栖息之處。馬丹嘗折蝦鬚為杖。後棄杖而飛。鬚化為丹。亦在海傍。

帝昇望月臺。時暝望南端。有三青鴨羣飛。俄而止於臺上。帝悅之。至夕鴨宿於臺端。日色已暗。帝求海肺之膏。以為燈焉。取靈澤布為繅。火光甚微。而光色無幽不入。青鴨化為三小童。皆著青絳文繡。各握鯨文大錢五枚。置帝几前。身止影動。因名輕影錢。

元封三年。數過國。獻能言龜一頭。長一尺二寸。盛以青玉匣。廣一尺九寸。匣上豁一孔以通氣。東方朔曰。唯承桂露以飲之。置於通風之臺上。欲往卜。命朔而問焉。言無不中。

唯有一女人。愛悅於帝。名曰巨靈。帝傍有青珉唾壺。巨靈乍出入其中。或戲笑帝前。東方朔望見巨靈。乃目之。巨靈因而飛去。望見化成青雀。因其飛去。帝乃起青雀臺。時見青雀來。則不見巨靈也。